



Comhairle an
Aontais Eorpaigh

An Bhruiséil, 18 Meán Fómhair 2020
(OR. en)

10928/20

**Comhad Idirinstitiúideach:
2020/0260(NLE)**

**RECH 323
COMPET 418
IND 143
TELECOM 148**

TOGRA

ó:	Ardrúnaí an Choimisiúin Eorpaigh, arna shíniú ag Jordi AYET PUIGARNAU, Stiúrthóir
dáta a fuarthas:	18 Meán Fómhair 2020
chuig:	Jeppe TRANHOLM-MIKKELSEN, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2020) 569 final
Ábhar:	Togra le haghaidh RIALACHÁN ÓN gCOMHAIRLE maidir leis an gComhghnóthas Ríomhaireachta Ardfeidhmíochta Eorpach a bhunú

Gheobhaidh na toscaireachtaí i gceangal leis seo doiciméad COM(2020) 569 final.

Faoi iamh: COM(2020) 569 final



AN COIMISIÚN
EORPACH

An Bhruiséil, 18.9.2020
COM(2020) 569 final

2020/0260 (NLE)

Togra le haghaidh

RIALACHÁN ÓN gCOMHAIRLE

maidir leis an gComhghnóthas Ríomhaireachta Ardfeidhmíochta Eorpach a bhunú

{SWD(2020) 179 final}

MEABHRÁN MÍNIÚCHÁIN

1. COMHTHÉACS AN TOGRA

• Forais agus cuspóirí an togra

Acmhainn mórtábhachta i gclaochlú digiteach na sochaí is ea an Ríomhaireacht Ardfheidhmíochta, is é sin córais ríomhaireachta (“sár-ríomhairí”) a bhfuil cumhacht ríomhaireachta thar a bheith ard iontu, ríomhairí a bhfuil réiteach acu ar fhadhbanna móra ríchasta. Sin iad is “inneall” cumhachta don geilleagar sonraí, agus is féidir leo teicneolaíochtaí tábhachtacha a chumasú, an intleacht shaorga (IS), an anailísíocht sonraí agus an chibearshlándaíl mar shampla, d’fhonn leas a bhaint as poitéinseal ollmhór na mórshonraí.

Tá an Ríomhaireacht Ardfheidhmíochta ag cur ar a gcumas d'earnálacha tionsclaíochta go leor a bheith nuálach agus dul i dtreo táirgí agus seirbhísí is airde luach, agus an cosán a leagan amach chun feidhmchláir nua a fhorbairt le haghaidh an tionscail i gcomhar le hardteicneolaíochtaí digiteacha eile. Is rudaí riachtanacha feidhmchláir agus bonneagair ríomhaireachta ardfheidhmíochta i mbeagnach gach réimse taighde, idir an fhisic bhunúsach agus an bithleigheas, d’fhonn tuiscint eolaíoch níos doimhne fháil agus chun dul chun cinn a dhéanamh. Is uirlis riachtanach í an Ríomhaireacht Ardfheidhmíochta freisin do thaighdeoirí agus do lucht déanta beartas chun dul i ngleic le mórdhúshláin na sochaí, idir an t-athrú aeráide, an fhorbairt chliste ghlas, an talmhaíocht inbhuanaithe, leigheas pearsantaithe, agus bainistiú géarchéimeanna. Sampla an-ábhartha is ea an phaindéim COVID-19, nuair is minic úsáid á baint as Ríomhaireacht Ardfheidhmíochta, i gcomhar le hintleacht shaorga, chun le drugaí nua a thabhairt ar an saol gan mhoill, leathadh an víris a thuar, acmhainní leighis atá gann a phleanáil agus a leithdháileadh, agus éifeachtacht na mbeart imshrianta agus cúrsaí i ndiaidh na paindéime a mheas.

As seo go ceann cúpla bliain, an ról ceannasach a bheidh ag an Eoraip sa gheilleagar sonraí, a sármhaitheas san eolaíocht, agus a hiomaíochas i gcúrsaí tionsclaíochta, is ar a cumas i leith na nithe seo a leanas a bheidh sin ar fad ag brath: príomhtheicneolaíochtaí sa ríomhaireacht ardfheidhmíochta a fhorbairt, rochtain a sholáthar ar bhonneagar, sonraí de scoth an domhain a chaomhnú maille leis an sármhaitheas sa ríomhaireacht atá ar a toil faoi láthair aici. Ionas go dtarlóidh sé sin, is rud riachtanach cur chuige straitéiseach uile-Eorpach a bheith ann.

Bunaíodh¹ an Comhghnóthas Ríomhaireachta Ardfheidhmíochta Eorpach i mí Dheireadh Fómhair 2018 mar chreat dlíthiúil agus mar chreat airgeadais, ag comhthiomsú acmhainní ón Aontas Eorpach, ó 32 thír, agus ó dhá Bhall Phríobháideacha: an tArdán Teicneolaíochta Eorpach um Ríomhaireacht Ardfheidhmíochta agus Big Data Value Association (BDVA). Go nuige seo, d’úsáid an Comhghnóthas cistí as an gCreat Airgeadais Ilbhliantúil 2014–2020 dá chuid infheistíochtaí straitéiseacha. Tar éis a bheith ag feidhmiú le 20 mí, tá an infheistíocht fhoriomlán i Ríomhaireacht Ardfheidhmíochta ar leibhéal Eorpach méadaithe go substaintiúil aige agus tá sé ag tosú ag obair chun a mhisean a chur i gcrích, is é sin seasamh na hEorpa mar chumhacht cheannasach na Ríomhaireachta Ardfheidhmíochta a chur ar ais. Faoi dheireadh na bliana 2020, cuirfidh sé bonneagar sár-ríomhaireachta agus sonraí den chéad scoth ag obair a mbeidh fáil ag úsáideoirí poiblí agus príobháideacha ar fud na hEorpa air. Tá na hinfheistíochtaí a dhéanann sé ag tabhairt tacaíochta freisin do Lárionaid Inniúlachta um Ríomhaireacht Ardfheidhmíochta ar fud na hEorpa, a áiríonn go bhfuil Ríomhaireacht Ardfheidhmíochta ar fáil go forleathan san Aontas agus a sholáthraíonn seirbhísí agus acmhainní sonracha don nuálaíocht tionsclaíche (lena n-áirítear FBManna) agus forbairt

¹ Rialachán (AE) 2018/1488 ón gComhairle maidir leis an gComhghnóthas Ríomhaireachta Ardfheidhmíochta Eorpach a bhunú

scileanna sa Ríomhaireacht Ardfheidhmíochta, agus taighde agus nuálaíocht i gcrua-earraí criticiúla Ríomhaireachta Ardfheidhmíochta agus teicneolaíochtaí agus feidhmchláir bogearraí. Méadófar leis sin cumas an Aontais Eorpaigh teicneolaíocht nuálach a tháirgeadh sa Ríomhaireacht Ardfheidhmíochta.

Leagadh síos sprioc sa Rialachán ón gComhairle maidir leis an gComhghnóthas Ríomhaireachta Ardfheidhmíochta Eorpach a bhunú in 2018 chun an chéad teorainn eile sár-ríomhaireachta a shroicheadh, feidhmíocht eicsea-scála,² i.e. córais ríomhaireachta atá ábalta níos mó ná aon trilliún (10^{18}) oibríocht in aghaidh an tsoicind a chur i gcrích, faoi na blianta 2022 go dtí 2023. Thiocfadh an méadú sin ar chumhacht ríomhaireachta ó úsáid ríomhairí candamacha agus ó bhogadh chuig teicneolaíochtaí iar-eacsascálaithe freisin.

Leanann an Rialachán atá beartaithe ar aghaidh go bunúsach leis an tionscnamh reatha a bunaíodh faoi Rialachán (AE) 2018/1488 ón gComhairle, ag tabhairt modhnuithe isteach chun an Rialachán a chur in oiriúint do na chéad Chláir eile den chreat airgeadais ilbhliantúil, ach chun tosaíochtaí an Choimisiúin a léiriú freisin, agus a chur ar chumas an Chomhghnóthais cistiú ó na cláir nua den chreat airgeadais ilbhliantúil a úsáid le haghaidh 2021–2027. Is iad na cláir sin Fís Eorpach, an Clár don Eoraip Dhigiteach agus an tSaoráid um Chónascadh na hEorpa. Beidh an cistiú sin riachtanach don Eoraip chun an chéad teorainn sár-ríomhaireachta eile seo den ríomhaireacht eicsea-scála a bhaint amach. Tabharfaidh sé deis chun an tAontas a fheistiú le seirbhís sár-ríomhaireachta agus ríomhaireachta candamaí agus bonneagar sonraí den chéad scoth a bheidh cónasctha, slán agus hipearnasctha, agus na teicneolaíochtaí, na feidhmchláir agus na scileanna riachtanacha a fhorbairt chun cumais eacsascálaithe a bhaint amach, a mheastar a tharlóidh timpeall ar 2023–2025 agus iar-eacsascálaithe thart ar 2025–2027, agus éiceachóras nuálaíochta den chéad scoth sa Ríomhaireacht Ardfheidhmíochta agus sa ríomhaireacht chandamach san Eoraip á chur chun cinn ag an am céanna.

Toisc nach bhfuil aon athrú ar phríomhspreagthóirí agus ar phríomhchuspóirí an Chomhghnóthais Ríomhaireachta Ardfheidhmíochta Eorpaigh ó bunaíodh é, tá an Measúnú Tionchair a foilsíodh i mí Eanáir 2018³ fós bailí. Ina theannta sin, cuireadh na cuspóirí maidir le Ríomhaireacht Ardfheidhmíochta san áireamh sa Mheasúnú Tionchair a bhí ag gabháil leis an togra maidir le Rialachán ó Pharlaimint na hEorpa agus ón gComhairle lenar bunaíodh an clár don Eoraip Dhigiteach don tréimhse 2021–2027⁴.

Dá réir sin, tá Doiciméad Inmheánach Oibre (SWD) ag gabháil le togra an Choimisiúin le haghaidh Rialacháin nua EuroHPC, ina dtugtar achoimre ar an bhfianaise a bailíodh ó 2018. Déantar anailís sa Doiciméad Inmheánach Oibre ar éabhlóid na bpríomhspreagthóirí socheacnamaíocha agus teicneolaíochta agus ar riachtanais úsáideoirí a dhéanann difear d'éabhlóid na mbonneagar, na dteicneolaíochtaí agus na bhfeidhmchlár Ríomhaireachta Ardfheidhmíochta agus sonraí sa todhchaí san Aontas Eorpach agus ar fud an domhain, agus tosaíochtaí polaitiúla an Aontais le haghaidh 2020–2025 á gcur san áireamh. Cuirtear na figiúirí is déanaí ón margadh Ríomhaireachta Ardfheidhmíochta i láthair ann agus tugtar achoimre ar na príomhcheachtanna a foghlaimíodh ó ghníomhaíocht an Chomhghnóthais go dtí seo. Déantar cur síos ann ar an ról a bheidh ag an Ríomhaireacht Ardfheidhmíochta sa ghar-thodhchaí le haghaidh chlaohlú digiteach na hEorpa, agus chun spás sonraí Eorpach aonair a chruthú. Ar deireadh, tugtar fianaise ar thábhacht ghníomhaíocht an Chomhghnóthais Ríomhaireachta Ardfheidhmíochta Eorpaigh, agus an tionchar a bheidh aige má leantar leis ar

² Féach an brollach, roinn 12. ‘Ba cheart an Comhghnóthas a bhunú agus ba cheart dó tosú ag feidhmiú faoi thús 2019 ar a dhéanaí chun an sprioc maidir leis an Aontas a fheistiú le bonneagar réamh-eacsascálaithe faoi 2020, agus na teicneolaíochtaí agus na feidhmchláir a fhorbairt atá riachtanach chun cumais eacsascálaithe a bhaint amach timpeall ar 2023 go dtí 2025.’

³ SWD(2018) 6 final

⁴ COM(2018) 434 final, SEC(2018) 289 final, SWD(2018) 306 final

líon méadaithe teicneolaíochtaí agus feidhmchlár criticiúil as seo go ceann deich mbliana, go háirithe an tsármhaitheas Eorpach i dteicneolaíochtaí próiseálaí ísealchumhachta agus san intleacht shaorga.

Cén chaoi a bhfeidhmeoidh an Chomhghnóthas Ríomhaireachta Ardfheidhmíochta Eorpach?

Is é misean an Chomhghnóthais Ríomhaireachta Ardfheidhmíochta Eorpaigh atá beartaithe ná forbairt a dhéanamh ar mhisean an Chomhghnóthais Ríomhaireachta Ardfheidhmíochta Eorpaigh a bunaíodh i mí Dheireadh Fómhair 2018. Níl na cuspóirí fadtéarmacha modhnaithe go bunúsach, i.e. bonneagar Ríomhaireachta Ardfheidhmíochta agus sonraí den chéad scoth a úsáid agus a oibriú, agus sár-éiceachóras Ríomhaireachta Ardfheidhmíochta Eorpaí a fhorbairt agus a chur chun cinn. Cuirtear an bhéim ar an ré eacsascálaithe a bhaint amach agus leathnú amach chuig cuir chuige nua den Ríomhaireacht Ardfheidhmíochta bunaithe ar theicneolaíochtaí candamacha.

Tá gníomhaíocht an Chomhghnóthais atá beartaithe bunaithe timpeall ar chúig phríomhchólún:

- (a) *Bonneagar*: Leanfaidh an colún ag díriú ar bhonneagar sár-ríomhaireachta den chéad scoth a fháil. Leathnaíodh a chuid gníomhaíocht áfach ní hamháin chun fáil, úsáid, agus oibriú bonneagair sár-ríomhaireachta den chéad scoth a áireamh, ach bonneagar ríomhaireachta candamaí freisin.
- (b) *Cónaidhm seirbhísí sár-ríomhaireachta*: Is colún nua é seo. Cumhdófar gníomhaíocht leis chun rochtain néalbhunaithe a sholáthar ar fud an Aontais ar acmhainní agus ar sheirbhísí sár-ríomhaireachta, ríomhaireachta candamaí agus sonraí, atá cónasctha agus slán, ar fud na hEorpa le haghaidh úsáideoirí poiblí agus príobháideacha. Áireofar tacaíocht d'idirnasc na n-acmhainní Ríomhaireachta Ardfheidhmíochta, ríomhaireachta candamaí agus sonraí leis an gcolún. A n-idirnasc le spásanna coiteanna sonraí Eorpacha agus le bonneagair néil chónasctha an Aontais agus, forbairt, fáil agus oibriú ardáin le haghaidh soláthar seirbhíse néalbhunaithe rianúil, cónasctha agus slán de sheirbhís sár-ríomhaireachta agus ríomhaireachta candamaí agus bonneagar sonraí.
- (c) *Teicneolaíocht*: Leanfaidh an colún seo ag tabhairt tacaíochta do chlár oibre uailmhianach taighde agus nuálaíochta chun éiceachóras sár-ríomhaireachta nuálach den chéad scoth a fhorbairt. Tacóidh an colún le teicneolaíochtaí crua-earraí agus bogearraí, agus a gcomhtháthú i gcórais ríomhaireachta, ag cumhdach an tslabhra luacha eolaíoch agus tionsclaíoch iomláin. Ina theannta sin, tacóidh sé leis na teicneolaíochtaí agus leis na córais a bheidh de dhíth chun córais sár-ríomhaireachta chlasaici a idirascadh agus a oibriú le teicneolaíochtaí ríomhaireachta comhlántacha eile, go háirithe ríomhaireacht néaramorfach nó chandamach.
- (d) *Feidhmchláir*: Bhí an colún seo mar chuid de cholún teicneolaíochta an Chomhghnóthais Ríomhaireachta Ardfheidhmíochta Eorpaigh a bunaíodh i mí Dheireadh Fómhair 2018. Tá sé as féin anois, áfach, ionas go dtabharfar aitheantas don tábhacht atá tugtha dó i rith na mblianta, go háirithe an leathnú amach chuig feidhmeanna atá ábhartha ar bhonn tionsclaíoch. Tacóidh an colún seo le gníomhaíocht chun an sármhaitheas a bhaint amach agus seasamh ceannasach reatha na hEorpa i bpríomh-fheidhmchláir ríomhaireachta agus sonraí agus cód le haghaidh na heolaíochta, an tionscail (lena n-áirítear FBManna) agus na hearnála poiblí a chothú, lena n-áirítear tacaíocht do Lárionaid Sármhaitheasa i bhfeidhmchláir Ríomhaireachta Ardfheidhmíochta.

- (e) *Úsáid agus scileanna leathnaithe*: Bhí an colún seo mar chuid de cholún teicneolaíochta an Chomhghnóthais Ríomhaireachta Ardfheidhmíochta Eorpaigh roimh seo a bunaíodh i mí Dheireadh Fómhair 2018, agus a chuaigh i ngleic go príomha le Lárionaid Náisiúnta Inniúlachta um Ríomhaireacht Ardfheidhmíochta a chruthú agus iad a líonrú. Mar sin féin, tá sé as féin anois ionas go dtabharfar aitheantas don tábhacht atá tugtha dó i rith na mblianta, go háirithe mar gheall ar an rannpháirteachas sa tosaíocht Scileanna Digiteacha den Chlár don Eoraip Dhigiteach. Díreoidh an colún seo ar ghníomhaíocht chun an sármhaitheas a chothú in úsáid agus scileanna sár-ríomhaireachta, ríomhaireachta candamaí, agus sonraí. Beidh sé mar aidhm aige an úsáid eolaíoch agus thionsclaíoch a bhaintear as acmhainní sár-ríomhaireachta agus as feidhmchláir sonraí a leathnú, agus rochtain agus úsáid thionsclaíoch as bonneagair sár-ríomhaireachta agus sonraí i gcomhair na nuálaíochta a chothú, agus iad a chur in oiriúint do riachtanais tionsclaíochta; agus, chun pobal eolaíoch eolach ceannródaíoch agus lucht oibre oilte a sholáthar don Eoraip.

Is mar seo a leanas atá ballraíocht an Chomhghnóthais atá beartaithe:

- *baill phoiblí*: an tAontas (a mbeidh an Coimisiún mar ionadaí dó) agus na Ballstáit agus na tíortha atá bainteach le Fís Eorpach, an Clár don Eoraip Dhigiteach agus an tSaoráid um Chónascadh na hEorpa ar mian leo a bheith rannpháirteach (Stáit Rannpháirteacha)⁵. Is faoi Bhallstáit agus Tíortha Comhlachaithe eile dul isteach sa chomhghnóthas.
- *baill phríobháideacha*: tá siad sin fós mar an gcéanna leo sin a bhí i Rialachán (AE) 2018/1488 ón gComhairle – Ardán Teicneolaíochta Eorpach um Ríomhaireacht Ardfheidhmíochta agus cumainn tionsclaíochta BDVA.

Tá rialachas agus leithdháileadh chearta vótála an Chomhghnóthais atá beartaithe fós comhionann leis na cinn a sainíodh i Rialachán (AE) 2018/1488 ón gComhairle.

Leanfaidh an Comhghnóthas Ríomhaireachta Ardfheidhmíochta Eorpach ag cur plean oibre straitéiseach na Ríomhaireachta Ardfheidhmíochta chun feidhme mar a shainítear sna cláir oibre straitéiseacha ilbhliantúla i gcomhair taighde agus nuálaíochta arna bhforbairt ag Grúpa Comhairleach Taighde agus Nuálaíochta EuroHPC agus ag Grúpa Comhairleach Bonneagair EuroHPC⁶ (INFRAG), arna chomhlánú ag Clár Oibre Taighde Straitéisigh Bhaill Phríobháideacha EuroHPC,⁷ d'fhonn éiceachóras na Ríomhaireachta Ardfheidhmíochta⁸ a bhunú.

Bheadh ranníocaíocht airgeadais an Aontais leis an gComhghnóthas faoin gcreat airgeadais ilbhliantúil 2021–2027 cothrom le EUR [XXXX], á mheaitseáil le méid cothrom ar a laghad den ranníocaíocht iomlán ó na Stáit Rannpháirteacha agus ó Bhaill Phríobháideacha an Chomhghnóthais Ríomhaireachta Ardfheidhmíochta Eorpaigh. Bainfidh an Comhghnóthas úsáid as na cistí sin go príomha chun a chuid gníomhaíochta a chur chun feidhme faoi na cúig cholún a bhfuil tuairisc orthu thuas.

⁵ Is iad seo a leanas na Stáit Rannpháirteacha i socrú reatha an Chomhghnóthais Ríomhaireachta Ardfheidhmíochta Eorpaigh: An Bheilg, an Bhulgáir, an Chipir, an Chróit, an Danmhairg, an Eastóin, an Eilvéis, Éire, an Fhionlainn, an Fhrainc, an Ghearmáin, an Ghréig, an Iodáil, an Iorua, an Íoslainn, an Ísiltír, an Laitvia, an Liotuáin, Lucsamburg, an Mhacadóin Thuaidh, Montainéagró, an Ostair, an Pholainn, an Phortaingéil, Poblacht na Seice, an Rómáin, an tSlóivéin, an tSlóvaic, an Spáinn, an tSualainn, an Tuirc, agus an Ungáir.

⁶ https://eurohpc-ju.europa.eu/documents/EuroHPC_RIAG_Strategic_Agenda_2019.pdf

⁷ https://eurohpc-ju.europa.eu/documents/EuroHPC_INFRAG_Multiannual_Strategic_Agenda_2019.pdf

⁸ [https://www.etp4hpc.eu/pujades/files/ETP4HPC_SRA4_2020_web\(1\).pdf](https://www.etp4hpc.eu/pujades/files/ETP4HPC_SRA4_2020_web(1).pdf)

D'áireofaí iad seo a leanas leis na príomhthorthaí a mbeifí ag súil leo don Chomhghnóthas Ríomhaireachta Ardfheidhmíochta Eorpach sna chéad deich mbliana eile:

- Bonneagar Ríomhaireachta Ardfheidhmíochta agus sonraí Eorpach atá cónasctha, slán agus hipearnasctha le sár-ríomhairí meán-raoin agus dhá chóras eicseascálaithe den chéad scoth ar a laghad agus dhá chóras iar-eicseascálaithe den chéad scoth (a mbeidh ceann as gach catagóir ar a laghad tógtha le teicneolaíocht Eorpach);
- Bonneagair ríomhaireachta hibride lena gcomhtháthaítear ardchórais ríomhaireachta – eadhon ionsamhlóirí candamacha agus ríomhairí candamacha – i mbonneagair Ríomhaireachta Ardfheidhmíochta;
- Bonneagar Ríomhaireachta Ardfheidhmíochta agus sonraí néalbhunaithe slán le haghaidh úsáideoirí príobháideacha Eorpacha;
- Inniúlachtaí agus seirbhísí cumhachtaithe ag Ríomhaireacht Ardfheidhmíochta bunaithe ar spásanna sonraí poiblí Eorpacha d'eolaithe, don tionscal agus don earnáil phoiblí;
- Bloic thógála teicneolaíochta den chéad ghlúin eile (crua-earraí agus bogearraí) agus a gcomhtháthú in ailtireachtaí nuálacha Ríomhaireachta Ardfheidhmíochta le haghaidh córais eacascálaithe agus iar-eicseascálaithe;
- Lárionaid Sármhaitheasa i bhfeidhmchláir Ríomhaireachta Ardfheidhmíochta agus tionsclú bogearraí Ríomhaireachta Ardfheidhmíochta, le halgartaim, cóid agus uirlisí nua atá barrfheabhsaithe le haghaidh glúine sár-ríomhairí sa todhchaí;
- Binsí tástála agus ardáin tionsclaíochta trialacha ar mhórsála le haghaidh feidhmchláir agus seirbhísí Ríomhaireachta Ardfheidhmíochta agus sonraí i bpríomhearnálacha tionsclaíochta;
- Lárionaid Inniúlachta Náisiúnta um Ríomhaireacht Ardfheidhmíochta, ag áirithiú go mbeidh cumhdach leathan ag an Ríomhaireacht Ardfheidhmíochta san Aontas, le seirbhísí agus acmhainní sonracha i gcomhair na nuálaíochta tionsclaíche (lena n-áirítear FBManna);
- Méadú suntasach i scileanna agus fios gnó maidir le Ríomhaireacht Ardfheidhmíochta i measc lucht oibre na hEorpa;
- Stór sonraí, inniúlachtaí próiseála, agus seirbhísí nua atreisithe, i réimsí leasa phoiblí ar fud na mBallstát.

• **Comhsheasmhacht le forálacha beartais atá sa réimse beartais cheana**

An 19 Feabhra 2020, ghlac an Coimisiún an Teachtaireacht “An Straitéis Eorpach maidir le Sonraí”,⁹ inar tugadh imlíne de straitéis na hEorpa le haghaidh bearta beartais agus infheistíochtaí chun tacú le forbairt an gheilleagair sonraí go ceann cúig bliana. Tarraingítear aird inti go mbeidh an Ríomhaireacht Ardfheidhmíochta agus an ríomhaireacht chandamach riachtanach chun a áirithiú go soláthrófar acmhainní ríomhaireachta go rianúil le saintréithe difriúla feidhmíochta a bheidh de dhíth chun fás agus úsáid spásanna coiteanna sonraí Eorpacha agus bonneagair néil, chónasctha, shlána chun feidhmchláir phoiblí, thionsclaíocha agus eolaíocha a uasmhéadú.

An 19 Feabhra 2020, ghlac an Coimisiún freisin an Teachtaireacht “Todhchaí Dhigiteach na hEorpa a Mhúnlú”¹⁰, a chuir straitéis dhigiteach na hEorpa i láthair, ag díriú ar

⁹ COM/2020/66 final

¹⁰ Féach n. **Error! Bookmark not defined.** thuas.

phríomhchuspóirí lena áirithiú go gcuideoidh na réitigh dhigiteacha leis an Eoraip dul ina bealach féin i dtreo claochlú digiteach a théann chun tairbhe gach duine. I measc na príomhghníomhaíochta atá á mholadh aige tá infheistíocht a dhéanamh i dtógáil agus úsáid inniúlachtaí digiteacha comhpháirteacha ar thús cadhnaíochta, lena n-áirítear i dteicneolaíochtaí sár-ríomhaireachta agus i dteicneolaíochtaí candamacha, agus cáil sár-ríomhaireachta na hEorpa a leathnú chun réitigh nuálacha a fhorbairt le haghaidh leighis, iompair agus an chomhshaoil.

- **Comhsheasmhacht le beartais eile de chuid an Aontais**

An 10 Márta 2020 ghlac an Coimisiún an Teachtaireacht “Straitéis Nua Tionsclaíochta don Eoraip”,¹¹ ina leagtar amach straitéis tionsclaíochta uailmhianach don Eoraip chun na haistrithe dúbailte i dtreo na neodrachta aeráide agus na ceannaireachta digití a stiúradh. Cuirtear béim sa Teachtaireacht ar an tacaíocht, i measc nithe eile, d’fhorbairt príomhtheicneolaíochtaí cumasúcháin atá tábhachtach ar bhonn straitéiseach do thodhchaí thionsclaíoch na hEorpa, lena n-áirítear Ríomhaireacht Ardfheidhmíochta agus teicneolaíochtaí candamacha.

Ar deireadh, sa Teachtaireacht an 27 Bealtaine 2020 “Seo uain na hEorpa: Deisiú agus Ullmhú don Chéad Ghlúin Eile”,¹² sainaitníodh an Ríomhaireacht Ardfheidhmíochta mar acmhainn dhigiteach straitéiseach a bheidh ina tosaíocht d’fhoinsí infheistíochta i dtéarnamh na hEorpa, amhail an tSaoráid Téarnaimh agus Athléimneachta, InvestEU, agus an tSaoráid Infheistíochta Straitéisí.

2. BUNÚS DLÍ, COIMHDEACHT AGUS COMHRÉIREACHT

- **Bunús dlí**

Is é Airteagal 187 agus an chéad mhír d’Airteagal 188 den Chonradh ar Fheidhmiú an Aontais Eorpaigh bunús dlí thionscnamh an Chomhghnóthais Ríomhaireachta Ardfheidhmíochta Eorpaigh.

- **Coimhdeacht (maidir le hinniúlacht neamheisiach)**

Cumhdaítear prionsabail na coimhdeachta sa Rialachán atá beartaithe ar an mbealach céanna le Rialachán (AE) 2018/1488 ón gComhairle.

- **Comhréireacht**

Comhlíontar prionsabail na comhréireachta sa Rialachán atá beartaithe ar an mbealach céanna le Rialachán (AE) 2018/1488 ón gComhairle.

- **An rogha ionstraime**

Éilítear Rialachán ón gComhairle chun Comhghnóthas ina mbíonn an tAontas rannpháirteach a chruthú agus a oibriú.

3. TORTHAÍ Ó MHEASTÓIREACHTAÍ EX POST, Ó CHOMHAIRLIÚCHÁIN LEIS NA PÁIRTITHE LEASMHARA AGUS Ó MHEASÚNUITHE TIONCHAIR

- **Comhairliúcháin leis na páirtithe leasmhara**

Tarraingíonn an togra ón gCoimisiún le haghaidh Rialachán nua maidir le Comhghnóthas Ríomhaireachta Ardfheidhmíochta Eorpach ó chistí chreat airgeadais ilbhliantúil 2021–2027

¹¹ Féach n. **Error! Bookmark not defined.** thuas.

¹² COM/2020/456 final

agus tá Doiciméad Inmheánach Oibre ag gabháil leis. Níor tháinig aon athrú ar phríomhspreagthóirí agus cuspóirí an Rialacháin nua atá beartaithe ó bunaíodh é. Dá bhrí sin, tá toradh na gcomhairliúchán leis na páirtithe leasmhara atá ag gabháil le Rialachán (AE) 2018/1488 ón gComhairle fós bailí. Deimhníodh an toradh sin tuilleadh sa chomhairliúchán leis na páirtithe leasmhara a bhí ag gabháil leis an Togra maidir le Rialachán ó Pharlaimint na hEorpa agus ón gComhairle lenar bunaíodh an clár don Eoraip Dhigiteach le haghaidh na tréimhe 2021–2027¹³. Tógadh na céimeanna breise seo a leanas chun dul i gcomhairle leis na páirtithe leasmhara maidir leis na cuspóirí agus an cur chuige i leith gníomhaíochta a chur chun feidhme faoin gComhghnóthas nua, agus chun cuireadh a thabhairt dóibh cuidiú lena mhúnlú.

Chuathas i gcomhairle leis an 32 Stát Rannpháirteacha den Chomhghnóthas reatha agus tugadh cuireadh dóibh aiseolas a chur ar fáil maidir le cuspóirí an Chomhghnóthais nua, agus maidir le simpliú cúrsaí riaracháin freisin, go háirithe maidir le lárbhainistiú na ranníocaíochtaí airgeadais.

D'fhoilsigh Baill Phríobháideacha an Chomhghnóthais Ríomhaireachta Ardfheidhmíochta Eorpaigh Clár Oibre Straitéiseach i gcomhair Taighde agus Nuálaíochta,¹⁴ inar tugadh tuairisc ar na tosaíochtaí maidir le gníomhaíocht taighde agus nuálaíochta sa Ríomhaireacht Ardfheidhmíochta, chomh maith le gníomhaíocht a bhaineann le bonneagar, ag tarraingt aird ar thuairimí na bpobal soláthair teicneolaíochta agus anailísíochta sonraí. Mar an gcéanna, chuathas i gcomhairle leis na Baill Phríobháideacha maidir lena thosaíochtaí agus lena ghníomhaíocht sa todhchaí, agus maidir freisin lena rialachas, ranníocaíochtaí airgeadais na mBall Príobháideach agus tairbhíthe na gníomhaíochta a chuirfeadh an Comhghnóthas beartaithe chun feidhme, rialacha rannpháirtíochta, agus simpliú na rialacha agus na bpróiseas riaracháin.

- **Bailiú agus úsáid saineolais**

Tá taithí ag an gCoimisiún ar Chomhghnóthais a bhunú agus a bhainistiú. Bainfidh sé tairbhe go háirithe as an taithí agus na ceachtanna a foghlaimíodh ó chur chun feidhme an Chomhghnóthais Ríomhaireachta Ardfheidhmíochta Eorpaigh.

- **Measúnú tionchair**

Toisc nach bhfuil an Comhghnóthas Ríomhaireachta Ardfheidhmíochta Eorpach bunaithe ach ó mhí Dheireadh Fómhair 2018, tá an Measúnú Tionchair a foilsíodh i mí Eanáir 2018 a ghabhann le Rialachán (AE) 2018/1488 ón gComhairle fós bailí, toisc nár tháinig athrú substaintiúil ar na spreagthóirí ná ar na cuspóirí.

- **Oiriúnacht rialála agus simpliú**

Tá an togra seo le haghaidh Rialacháin lena mbunófar Comhghnóthas ag teacht le *Treoirlínte um Rialachán Níos Fearr* an Choimisiúin: go háirithe, tá sé beartaithe aige gan rialú ach amháin i gcás inar gá agus é a dhéanamh ar bhealach comhréireach. Leanann sé go dlúth an Comhghnóthas Ríomhaireachta Ardfheidhmíochta Eorpach a bunaíodh i Rialachán (AE) 2018/1488 ón gComhairle a mhéid is féidir, ag tarraingt ar thaithí a bailíodh sa chomhthéacs sin agus ag cur na n-athruithe a tugadh isteach leis na cláir chistiúcháin Fís Eorpach, Eoraip Dhigiteach agus an tSaoráid um Chónascadh na hEorpa san áireamh. Breithnítear ann freisin i gcás inarb iomchuí forálacha an Bhunghnímh Aonair lena mbunaítear na Comhghnóthais faoi Fís Eorpach.

¹³ COM(2018) 434 final, SEC(2018) 289 final, SWD(2018) 306 final

¹⁴ <https://www.etp4hpc.eu/sra-020.html>

4. IMPLEACHTAÍ BUISÉADACHA

Tharraingeodh an Comhghnóthas Ríomhaireachta Ardfheidhmíochta Eorpach a chuid cistí ó na buiséid atá á moladh ag an gCoimisiún le haghaidh gníomhaíocht Ríomhaireachta Ardfheidhmíochta sna Rialacháin lena mbunaítear Fís Eorpach, an Eoraip Dhigiteach agus an tSaoráid um Chónascadh na hEorpa. Bheadh suas le EUR [XXXX] ar an iomlán ar fáil ó na trí chlár [mar a leanas: suas le EUR 2 400 000 000 ón gClár don Eoraip Dhigiteach, suas le EUR 200 000 000 ón tSaoráid um Chónascadh na hEorpa agus suas le EUR XXXXX ó Fís Eorpach – cinnfear an buiséad ag tráth níos déanaí de réir Phleanáil agus Chlársceidealú Straitéiseach Fís Eorpach].

Meaitseálfar é sin le méid chomhionann ar a laghad ó na Stáit Rannpháirteacha, mar chuid dá gclár náisiúnta agus réigiúnacha sa Ríomhaireacht Ardfheidhmíochta agus a gcistí struchtúracha. Ba cheart do na heintitis phríobháideacha méid de EUR [XXXX] ar a laghad a sholáthar [cinnfear an ranníocaíocht ag céim níos déanaí nuair a shaineofar buiséad Fís Eorpach de réir Phleanáil agus Chlársceidealú Straitéiseach Fís Eorpach]. Rannchuideoidh na Stáit Rannpháirteacha agus na Baill Phríobháideacha araon le costais riaracháin an Chomhghnóthais.

5. EILIMINTÍ EILE

- **Pleananna cur chun feidhme, agus socruithe faireacháin, meastóireachta agus tuairiscithe**

Tá sé beartaithe meastóireacht agus faireachán a dhéanamh ar ghníomhaíocht an Chomhghnóthais atá beartaithe, i gcomhréir leis an gclár Fís Eorpach. Cinnfear leis sin éifeachtacht an Chomhghnóthais mar ionstraim dlí agus airgeadais chun cuspóirí straitéis Ríomhaireachta Ardfheidhmíochta na hEorpa a bhaint amach, ach cinnfear freisin cé chomh héifeachtach agus atá sé ag cur le beartais an Aontais. Go háirithe, déanfar measúnú ar leibhéal rannpháirtíochta na Stát Rannpháirteach agus na mBall Príobháideach i ngníomhaíocht an Chomhghnóthais, agus mar a chuireann siad leo.

Foilseoidh an Comhghnóthas beartaithe tuarascáil bhliantúil maidir le gníomhaíocht ina dtarraingeofar aird ar an ngníomhaíocht a glacadh, an caiteachas comhfhreagrach, agus fáil agus oibriú na Ríomhaireachta Ardfheidhmíochta, na ríomhaireachta candamaí agus an bhonneagair seirbhíse agus sonraí a soláthróidh agus a bheidh faoi úinéireacht an Chomhghnóthais. Déanfar measúnú ar bhaint amach na gcuspóirí ginearálta i gcoinne na bpríomhtháscairí feidhmíochta le haghaidh Comhghnóthas a fhaigheann cistiú ó Fís Eorpach agus na bpríomhtháscairí feidhmíochta atá sonrach don Chomhghnóthas Ríomhaireachta Ardfheidhmíochta Eorpach.

- **Míniúchán mionsonraithe ar fhorálacha sonracha an togra**

Bunaítear le hAirteagal 1 an Comhghnóthas **Ríomhaireachta Ardfheidhmíochta Eorpach**, agus sonraítear a **shuíochán ann**.

Soláthraítear in Airteagal 2 sainmhínithe ar ‘am rochtana’, ‘tástáil inghlacthachta’, ‘lárionad inniúlachta’, ‘sár-ríomhaire EuroHPC’, ‘eicsea-scála’, ‘sár-ríomhaire ardleibhéil’, ‘sár-ríomhaire meán-raoin’, ‘ríomhaire candamach’, ‘ionsamhlóir candamach’, ‘eintiteas óstach’, ‘comhaontú óstaigh’, ‘hipearnasc th |a’, ‘ranníocaíocht chomhchineáil’, ‘Stát Rannpháirteach’, ‘Ball Príobháideach’, nó ‘úsáideoir’.

Sonraítear in Airteagal 3 **misean** agus **cuspóirí** an Chomhghnóthais Ríomhaireachta Ardfheidhmíochta Eorpaigh.

Sonraítear in Airteagal 4 colúin **ghníomhaíochtaí** an Chomhghnóthais Ríomhaireachta Ardfhaidhmíochta Eorpaigh.

Sonraítear in Airteagal 5 ranníocaíocht airgeadais an Aontais le costais riaracháin agus oibriúcháin an Chomhghnóthais Ríomhaireachta Ardfhaidhmíochta Eorpaigh le cistiú ó **Fís Eorpach**, ón **gClár don Eoraip Dhigiteach** agus ón **tSaoráid um Chónascadh na hEorpa**.

Sonraítear in Airteagal 6 cad iad na ranníocaíochtaí breise a d'fhéadfadh teacht ó chláir an Aontais seachas iad sin dá dtagraítear in Airteagal 5.

Sonraítear in Airteagal 7 ranníocaíochtaí cistiúcháin na **Stát Rannpháirteach** agus na **mBall Priobháideach** leis na costais riaracháin agus oibriúcháin.

Tagraítear in **Airteagal 8** don **eintiteas óstach** a gcuirfidh an Comhghnóthas ar a iontaoibh na sár-ríomhairí **réamh-eacsascálaithe a oibriú** agus sonraítear an próiseas ina ndéanfar é a roghnú.

Leagtar amach in Airteagal 9 ábhar an **chomhaontaithe óstaigh**, ag leagan síos róil agus fhreagrachtaí an eintitis óstaigh.

Foráiltear le **hAirteagal 10** gur cheart gurb é an **Comhghnóthas a bheadh mar úinéir ar na sár-ríomhairí ardleibhéil a fhaigheann sé** go dtí deireadh a saolré eacnamaíche, tráth a n-aistreofar iad chuig an eintiteas óstach.

Foráiltear le **hAirteagal 11** gur cheart gurb é an **Comhghnóthas a bheadh mar úinéir ar na ríomhairí candamacha agus na hionsamhlóirí candamacha a fhaigheann sé** go dtí deireadh a saolré eacnamaíche, tráth a n-aistreofar iad chuig an eintiteas óstach.

Foráiltear le **hAirteagal 12** gur cheart gurb é an **Comhghnóthas a bheadh mar chomhúinéir ar na sár-ríomhairí de ghrád tionsclaíoch a fhaigheann sé** mar aon leis na Baill Phríobháideacha nó cuibhreannas comhpháirtithe príobháideacha.

Foráiltear le **hAirteagal 13** gur cheart gurb é an **Comhghnóthas a bheadh mar chomhúinéir ar na sár-ríomhairí meán-raoin a fhaigheann sé** in éineacht leis na heintitis óstacha.

Sonraítear in Airteagal 14 an **úsáid** a bhainfear as na sár-ríomhairí EuroHPC agus na **coinníollacha rochtana d'úsáideoirí** na sár-ríomhairí.

Sonraítear in Airteagal 15 conas a chúiteofar an **Coimisiún Eorpach** agus **Stáit Rannpháirteacha EuroHPC** as a ranníocaíocht airgeadais chun na sár-ríomhairí réamh-eicseascálaithe a fháil: leithdháilfear sciar den **am rochtana** iomlán ar gach ranníocóir i gcomhréir lena ranníocaíocht airgeadais. Sonraítear ann freisin conas a leithdháilfear **am rochtana** an Aontais ar na sár-ríomhairí EuroHPC.

Sonraítear in Airteagal 16 na coinníollacha faoina soláthróidh an Comhghnóthas **seirbhísí tráchtála**.

Sonraítear in Airteagal 17 rialacha airgeadais an Chomhghnóthais; tá siad sin i gcomhréir leis an **Rialachán Airgeadais**.

Togra le haghaidh

RIALACHÁN ÓN gCOMHAIRLE

maidir leis an gComhghnóthas Ríomhaireachta Ardfeidhmíochta Eorpach a bhunú

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 187 agus an chéad mhír d’Airteagal 188 de,

Ag féachaint don togra ón gCoimisiún Eorpach,

Ag féachaint don tuairim ó Pharlaimint na hEorpa,

Ag féachaint don tuairim ó Choiste Eacnamaíoch agus Sóisialta na hEorpa,

De bharr an méid seo a leanas

- (1) Bunaítear Fís Eorpach – An Clár Réime um Thaighde agus um Nuálaíocht (2021–2027) le Rialachán (AE) Uimh. xxx ó Pharlaimint na hEorpa agus ón gComhairle¹. Féadfar codanna de Fís Eorpach a chur chun feidhme trí Chomhpháirtíochtaí Eorpacha, le comhpháirtithe ón earnáil phríobháideach agus/nó phoiblí, d’fhonn an tionchar is mó is féidir a bhaint amach ar chistiú ón Aontas agus rannchuidiú ar an mbealach is éifeachtaí le cuspóirí beartais an Aontais.
- (2) I gcomhréir le Rialachán (AE) Uimh. xxx ó Pharlaimint na hEorpa agus ón gComhairle agus le Cinneadh xxx ón gComhairle,² féadfar tacaíocht a sholáthar do Chomhghnóthais a bhunaítear faoi chuimsiú Fís Eorpach. Níor cheart comhpháirtíochtaí den sórt sin a chur chun feidhme ach amháin nuair nach n-éireodh le codanna eile den chlár Fís Eorpach, lena n-áirítear foirmeacha eile de Chomhpháirtíochtaí Eorpacha, na cuspóirí a bhaint amach nó nuair nach nginfidís na tionchair ionchais is gá, agus dá mbeadh údar leo trí dhearcadh fadtéarmach agus leibhéal ard comhtháthaithe. Sonraítear na coinníollacha faoina gcruthaítear comhpháirtíochtaí den sórt sin sa Chinneadh sin.
- (3) Is le Rialachán (AE) Uimh. xxx ó Pharlaimint na hEorpa agus ón gComhairle a bhunaítear an clár le haghaidh na hEorpa Digití, leo sin agus le Cinneadh ón gComhairle³. Tacaíonn an Clár don Eoraip Dhigiteach le cur chun feidhme na dtionscadal leasa choitinn a bhfuil sé d’aidhm acu bonneagar sár-ríomhaireachta, candamach agus sonraí de scoth an domhain a fháil, a úsáid agus a oibriú, le cónascadh agus idirnascadh, agus leathnú na húsáide a bhaintear as seirbhísí sár-ríomhaireachta agus le príomhscileanna a fhorbairt.

¹ [...]

² [...]

³ [...]

- (4) Bunaíodh an tSaoráid um Chónascadh na hEorpa le Rialachán (AE) Uimh. xxx ó Pharlaimint na hEorpa agus ón gComhairle⁴. Leis an tSaoráid um Chónascadh na hEorpa, is féidir tionscadail leasa choitinn a ullmhú agus a chur chun feidhme laistigh de chreat an bheartais líonraí tras-Eorpacha in earnálacha an iompair, na teileachumarsáide agus an fhuinnimh. Go háirithe, tacaíonn an tSaoráid um Chónascadh na hEorpa le cur chun feidhme na dtionscadal leasa choitinn sin a bhfuil sé d'aidhm acu bonneagair agus seirbhísí nua a fhorbairt agus a thógáil, nó bonneagair agus seirbhísí reatha a uasghrádú, sna hearnálacha iompair, teileachumarsáide agus fuinnimh. Cuidíonn an tSaoráid um Chónascadh na hEorpa le tacú le bonneagair nascachta digití a bhfuil leas coiteann iontu, rud a chruthaíonn buntáistí suntasacha dá bharr sin don tsochaí.
- (5) Cuirtear in iúl sa Teachtaireacht ón gCoimisiún an 19 Feabhra 2020 dar teideal ‘An Straitéis Eorpach maidir le Sonraí’ straitéis na hEorpa maidir le bearta beartais agus infheistíochtaí chun an geilleagar sonraí a chumasú go ceann cúig bliana. Tá béim sa straitéis ar spásanna coiteanna sonraí poiblí Eorpacha a chruthú, rud a chuirfidh dlús faoi fhás agus a chruthóidh luach. Ach tacaíocht a thabhairt do chruthú spásanna coiteanna sonraí Eorpach den sórt sin agus bonneagair néil chónasctha agus shlána d’áiríteofaí go mbeadh níos mó sonraí ar fáil le húsáid sa gheilleagar agus sa tsochaí, ach go mbeadh an smacht fós ag na cuideachtaí agus ag na daoine aonair a ghineann na sonraí sin. Is comhpháirteanna riachtanacha de sholáthar rianúil acmhainní ríomhaireachta is ea Ríomhaireacht Ardfheidhmíochta agus ríomhaireacht chandamach a bhfuil saintréithe feidhmíochta difriúla acu atá riachtanach chun fás agus saothrú spásanna coiteanna sonraí poiblí Eorpacha agus bonneagair néil chónasctha agus shlána d’fheidhmchláir phoiblí, thionsclaíocha agus eolaíocha a uasmhéadú.
- (6) Sa Teachtaireacht ón gCoimisiún an 19 Feabhra 2020 dar teideal “Todhchaí Dhigiteach na hEorpa a Mhúnlú”, cuirtear straitéis dhigiteach na hEorpa i láthair, ag díriú ar chúpla príomhchuspóir lena áirithiú go gcuideoidh réitigh dhigiteacha leis an Eoraip dul a bealach féin i dtreo claochlú digiteach a théann chun tairbhe na ndaoine. I measc na bpríomhghníomhaíochtaí atá á mholadh aige tá infheistíocht i dtógáil agus úsáid inniúlachtaí digiteacha comhpháirteacha ar thús cadhnaíochta, lena n-áirítear i dteicneolaíochtaí sár-ríomhaireachta agus i dteicneolaíochtaí candamacha, agus cáil sár-ríomhaireachta na hEorpa a leathnú chun réitigh nuálacha a fhorbairt le haghaidh leighis, iompair agus an chomhshaoil.
- (7) Sa Teachtaireacht ón gCoimisiún an 10 Márta 2020 dar teideal “Straitéis Nua Tionsclaíochta don Eoraip”, léirítear straitéis uailmhianach tionsclaíochta don Eoraip chun na haistrithe dubailte i dtreo na neodrachta aeráide agus na ceannaireachta digití a stiúradh. Cuirtear béim sa Teachtaireacht ar an tacaíocht, i measc nithe eile, d’fhorbairt príomhtheicneolaíochtaí cumasúcháin atá tábhachtach ar bhonn straitéiseach do thodhchaí thionsclaíoch na hEorpa, lena n-áirítear Ríomhaireacht Ardfheidhmíochta agus teicneolaíochtaí candamacha.
- (8) Sa Teachtaireacht ón gCoimisiún an 27 Bealtaine 2020 dar teideal “Seo í uain na hEorpa: Deisiú agus Ullmhú don Chéad Ghluin Eile” sainaithníodh roinnt acmhainní agus inniúlachtaí digiteacha straitéiseacha inar áiríodh Ríomhairí Ardfheidhmíochta agus teicneolaíochtaí candamacha mar thosaíocht sa tSaoráid Téarnaimh agus Athléimneacha, InvestEU agus sa tSaoráid Infheistíochta Straitéisí.

⁴

[...]

- (9) Tá an ról ceannasach atá ag an Eoraip sa gheilleagar sonraí, a sármhaitheas san eolaíocht, agus a neart tionsclaíoch ag brath níos mó agus níos mó ar a cumas príomhtheicneolaíochtaí sa Ríomhaireacht Ardfheidhmíochta a fhorbairt, chomh maith le rochtain a sholáthar ar bhonneagair sár-ríomhaireachta agus sonraí den chéad scoth, agus a ceannaireacht reatha i bhfeidhmchláir Ríomhaireachta Ardfheidhmíochta a chothú. Is teicneolaíocht phríomhshrutha í an Ríomhaireacht Ardfheidhmíochta le haghaidh chlaohlú digiteach gheilleagar na hEorpa, rud a chuireann ar chumas go leor earnálacha tionsclaíochta traidisiúnta dul i mbun nuálaíochta le táirgí agus seirbhísí a bhfuil luach níos airde acu. I gcomhar le hardteicneolaíochtaí digiteacha eile mar an Intleacht Shaorga, mórshonraí agus teicneolaíochtaí néil, tá an Ríomhaireacht Ardfheidhmíochta ag leagan amach an bealach i dtreo feidhmchláir nuálacha don tsochaí agus don tionscal i réimsí criticiúla don Eoraip amhail leigheas pearsantaithe, réamhaisnéis na haimsire agus athrú aeráide, forbairt agus iompar cliste agus glas, ábhair nua le haghaidh fuinneamh glas, dearadh drugaí agus tástáil fhíorúil, an talmhaíocht inbhuanaithe, nó an innealtóireacht agus an déantúsaíocht.
- (10) Is acmhainn straitéiseach í an Ríomhaireacht Ardfheidhmíochta i gcomhair ceapadh na mbeartas, ag cumhachtú feidhmchlár a sholáthraíonn an modh chun réitigh éifeachtúla a thuiscint agus a dhearadh chun dul i ngleic le mórán dúshlán domhanda agus i gcomhair bainistiú géarchéimeanna. Rannchuidíonn Ríomhaireacht Ardfheidhmíochta le príomhbheartais amhail an Comhaontú Glas don Eoraip ina bhfuil samhlacha agus uirlisí chun an líon méadaithe dúshlán chomhshaoil chasta a chlaohlú agus deiseanna a dhéanamh díobh i gcomhair na nuálaíochta sóisialta agus an fháis eacnamaíoch. Sampla de sin is ea an tionscnamh *Ceann Scribe: an Domhan*, tionscnamh a fógraíodh sna Teachtaireachtaí ón gCoimisiún an 11 Nollaig 2019 maidir leis “an gComhaontú Glas don Eoraip”, agus an 19 Feabhra 2020 maidir leis “an straitéis Eorpach maidir le sonraí” agus maidir le “Todhchaí dhigiteach na hEorpa a mhúnlú”.
- (11) Is léir ó imeachtaí domhanda ar nós na paindéime COVID-19 an tábhacht atá le hinfheistiú i Ríomhaireacht Ardfheidhmíochta agus in ardáin agus uirlisí samhaltaithe a bhaineann leis an tsláinte, toisc go bhfuil ról lárnach á imirt acu sa troid i gcoinne na paindéime, i gcomhar le teicneolaíochtaí digiteacha eile go minic amhail mórshonraí agus intleacht shaorga. Táthar ag úsáid na Ríomhaireachta Ardfheidhmíochta chun dlús a chur le sainaithint agus táirgeadh cóireálacha, chun leathadh víreas a thuar, chun cabhrú le leithdháileadh soláthairtí agus acmhainní leighis a phleanáil, agus chun ionsamhlú a dhéanamh ar bhearta scoir iar-phaindéime d’fhonn cásanna difriúla a mheas. Is uirlisí criticiúla ardáin agus uirlisí samhaltaithe na Ríomhaireachta Ardfheidhmíochta le haghaidh na paindéime reatha agus le haghaidh cinn sa todhchaí, agus beidh ról tábhachtach acu i sláinte agus i leigheas pearsantaithe.
- (12) Bunaíodh an Comhghnóthas Ríomhaireachta Ardfheidhmíochta Eorpach le Rialachán (AE) 2018/1488 an 28 Meán Fómhair 2018 agus é mar mhisean aige bonneagar sár-ríomhaireachta agus sonraí comhtháite den chéad scoth a fhorbairt, a úsáid, a leathnú agus a chothú san Aontas agus éiceachóras Ríomhaireachta Ardfheidhmíochta atá thar a bheith iomaíoch agus nuálach a fhorbairt agus tacú leis.
- (13) I bhfianaise forbairtí sa Ríomhaireacht Ardfheidhmíochta, ba rud caoithiúil athbhreithniú a dhéanamh ar an Rialachán lena áirithiú go leanfar den tionscnamh. Tá gá leis an athbhreithniú ar Rialachán (AE) Uimh. 2018/1488 ón gComhairle chun misean agus cuspóirí nua a shainiú don Chomhghnóthas Ríomhaireachta Ardfheidhmíochta Eorpach, ag cur san áireamh an anailís ar phríomhspreagthóirí socheacnamaíocha agus teicneolaíochta a dhéanann difear d’éabhlóid na mbonneagar, na dteicneolaíochtaí agus na bhfeidhmchlár Ríomhaireachta Ardfheidhmíochta agus

sonraí sa todhchaí san Aontas Eorpach agus ar fud an domhain, chomh maith leis na ceachtanna a foghlaimíodh ó ghníomhaíochtaí reatha an Chomhghnóthais Ríomhaireachta Ardfheidhmíochta Eorpaigh. Tá aird orthu sin sa Doiciméad Inmheánach Oibre SWD(2020)xxx atá ag gabháil le togra an Choimisiúin le haghaidh Rialacháin ón gComhairle. Is féidir fós athbhreithniú rialacha an Chomhghnóthais Ríomhaireachta Ardfheidhmíochta Eorpaigh a ailíniú leis an gcreat dlíthiúil nua, go háirithe an Rialachán maidir le Fís Eorpach, chomh maith leis na Rialacháin don Chlár don Eoraip Dhigiteach agus don tSaoráid um Chónascadh na hEorpa.

- (14) D'fhonn an fheidhmíocht ríomhaireachta is gá a chur ar fáil don Aontas chun a n-inniúlachtaí taighde agus tionsclaíochta a chothú go ceannródaíoch, ba cheart d'infheistíocht na mBallstát i Ríomhaireacht Ardfheidhmíochta agus i ríomhaireacht chandamach a bheith comhordaithe agus ba cheart an glacadh tionsclaíoch agus margaidh a bheadh le teicneolaíochtaí Ríomhaireachta Ardfheidhmíochta agus ríomhaireachta candamaí a atreisiú sna hearnálacha poiblí agus príobháideacha araon. Ba cheart don Aontas a chuid éifeachtachta a mhéadú ionas go bhféadfar córais Ríomhaireachta Ardfheidhmíochta agus ríomhaireachta candamaí Eorpacha atá dírithe ar éileamh agus bunaithe ar fheidhmchláir a dhéanamh de na forbairtí teicneolaíochta, rud a bhunódh nasc éifeachtach idir soláthar teicneolaíochta, comhdhearadh le húsáideoirí, agus soláthar comhpháirteach ar chórais de scoth an domhain, agus a chruthódh éiceachóras den chéad scoth i dteicneolaíochtaí agus i bhfeidhmchláir Ríomhaireachta Ardfheidhmíochta agus ríomhaireachta candamaí. Ag an am céanna, ba cheart don Aontas deis a thabhairt dá thionscal soláthair gearáil ar infheistíochtaí den sórt sin, agus as sin ghlacfaí leo i réimsí feidhmchláir mhórsála atá ag teacht chun cinn amhail leigheas pearsantaithe, an t-athrú aeráide, tiomáint nasctha agus uathoibrithe nó phríomh-mhargáí eile a bhfuil an intleacht shaorga, teicneolaíochtaí blocshlabhra, imeall-ríomhaireacht mar bhonn taca fúthu nó ar bhonn níos leithne trí dhigitiú thionscal na hEorpa.
- (15) Ionas go bhféadfaidh an tAontas gona Bhallstáit neamhspleáchas teicneolaíochta a bhaint amach i bpríomhtheicneolaíochtaí digiteacha amhail Ríomhaireacht Ardfheidhmíochta agus ríomhaireacht chandamach, ba cheart dóibh infheistiú i dteicneolaíochtaí sár-ríomhaireachta ísealchumhachta don chéad ghlúin eile, i mbogearraí nuálacha agus in ardchórais sár-ríomhaireachta le haghaidh ríomhaireacht eicseascála agus iar-eicseascálaithe agus le haghaidh ríomhaireacht chandamach, agus le haghaidh feidhmchláir nuálacha sár-ríomhaireachta agus sonraí le haghaidh leighis, an chomhshaoil, na déantúsaíochta agus na hinnealtóireachta. Ba cheart dá réir go dtiocfadh bláth ar thionscal soláthair na hEorpa i raon leathan príomhréimsí teicneolaíochta agus feidhmchlár a théann thar Ríomhaireacht Ardfheidhmíochta agus ríomhaireacht chandamach agus a chothaíonn margáí TFC níos leithne go fadtéarmach le teicneolaíochtaí den sórt sin. Thacódh a leithéid de rud freisin le tionscal eolaíochta agus úsáideoirí na Ríomhaireachta Ardfheidhmíochta agus na ríomhaireachta candamaí dul faoi chlaochlú digiteach agus dlús a chur faoina chumas nuálaíochta.
- (16) Is rud riachtanach fíis straitéiseach chomhchoiteann a lorg don Aontas Eorpach i Ríomhaireacht Ardfheidhmíochta agus i ríomhaireacht chandamach chun uaillmhian an Aontais agus a chuid Ballstát a chur i gcrích lena áirithiú go mbeidh ról ceann feadhna agus neamhspleáchas straitéiseach acu sa gheilleagar digiteach. Bheadh sé de chuspóir seirbhís Ríomhaireachta Ardfheidhmíochta agus ríomhaireachta candamaí hipearnasctha a bhunú san Eoraip, seirbhís chónascctha shlán, agus éiceachóras de bhonneagar sonraí a mbeadh forlámhas aige ar fud na cruinne, agus a bheith in ann córais Ríomhaireachta Ardfheidhmíochta agus ríomhaireachta candamaí nuálacha agus

iomaíocha a tháirgeadh bunaithe ar shlabhra soláthair a áiríteoidh comhpháirteanna, teicneolaíochtaí agus eolas lena gcuirfear teorainn ar an mbaol go gcuirfidh briseadh isteach orthu.

- (17) Is é an Comhghnóthas an ionstraim is fearr a fhéadfaidh an fhís straitéiseach don Aontas Eorpach i Ríomhaireacht Ardfheidhmíochta agus i ríomhaireacht chandamach a chur chun feidhme, ag áirithiú go mbaineann an tAontas sult as cumais sár-ríomhaireachta, ríomhaireachta candamaí agus sonraí den chéad scoth de réir a chumais eacnamaíoch, ag meaitseáil riachtanais úsáideoirí na hEorpa, agus leis an neamhspleáchas straitéiseach is gá i dteicneolaíochtaí criticiúla Ríomhaireachta Ardfheidhmíochta agus ríomhaireachta candamaí. Is é an Comhghnóthas an ionstraim ab fhearr chun an ceann is fearr a fháil ar na teorainneacha reatha, faoi mar a thuairiscítear sa Doiciméad Inmheánach Oibre a ghabhann leis an Rialachán seo, agus a thairgeann an tionchar is airde don gheilleagar, don tsochaí, agus don chomhshaol agus is é is fearr a fhéadfaidh cosaint a thabhairt do leasanna an Aontais sa Ríomhaireacht Ardfheidhmíochta agus sa ríomhaireacht chandamach. Is féidir leis acmhainní a chomhthiomsú ón Aontas, ó na Ballstáit agus ó na tíortha a bhaineann le Fís Eorpach agus leis an gClár don Eoraip Dhigiteach nó an tSaoráid um Chónascadh na hEorpa agus an earnáil phríobháideach. Is féidir leis creat soláthair a chur chun feidhme agus córais Ríomhaireachta Ardfheidhmíochta agus córais ríomhaireachta candamaí de scoth an domhain a oibriú. Is féidir leis cláir thaighde agus nuálaíochta a sheoladh chun teicneolaíochtaí Eorpacha a fhorbairt agus iad a chomhtháthú ina dhiaidh sin i gcórais sár-ríomhaireachta den chéad scoth.
- (18) Is cuid den phunann Comhpháirtíochtaí Institiúidithe é an Comhghnóthas Ríomhaireachta Ardfheidhmíochta Eorpach faoi Fís Eorpach lenar cheart iarracht a dhéanamh inniúlachtaí eolaíochta an Aontais a neartú chun bagairtí atá ag teacht chun cinn agus dúshlán sa todhchaí a láimhseáil i Limistéar Eorpach Taighde atreisithe; slabhraí luacha an Aontais atá á stiúradh ag an inbhuanaitheacht agus neamhspleáchas straitéiseach an Aontais a bhaint amach i bpríomhtheicneolaíochtaí agus tionscail; agus feabhas a chur ar an nglacadh a bheidh le réitigh nuálacha ina ngabhfad i ngleic le dúshlán aeráide, chomhshaoil, sláinte agus le dúshlán dhomhanda sochaí eile ag teacht le tosaíochtaí straitéiseacha an Aontais, lena n-áirítear neodracht aeráide a bhaint amach san Aontas in 2050.
- (19) Ba cheart an Comhghnóthas a bheith bunaithe agus é tosaithe ag feidhmiú faoi thús 2021 ar a dhéanaí go dtí an 31 Nollaig 2033 d'fhonn bonneagar sár-ríomhaireachta cónasctha, slán agus hipearnasctha den chéad scoth a chur ar fáil don Aontas, agus na teicneolaíochtaí, feidhmchláir agus na scileanna riachtanacha a fhorbairt chun cumais eacsascálaithe a bhaint amach timpeall 2022–2024, agus iar-eicseascálaithe timpeall 2025–2027, agus éiceachóras nuálaíochta Eorpach de scoth an domhain a chur chun cinn sa Ríomhaireacht Ardfheidhmíochta agus sa ríomhaireacht chandamach.
- (20) Ba cheart don chomhpháirtíocht phoiblí-phríobháideach i bhfoirm Comhghnóthais na hacmhainní airgeadais agus teicniúla atá riachtanach a thabhairt le chéile chun máistreacht a fháil ar an scéal casta a bhaineann le luas síor-mhéadaithe na nuálaíochta sa réimse seo. Dá bhrí sin, ba cheart gurbh iad an tAontas, na Ballstáit agus na tíortha atá bainteach le Fís Eorpach, an Clár don Eoraip Dhigiteach nó an tSaoráid um Chónascadh na hEorpa baill an Chomhghnóthais agus iad aontaithe ar thionscnamh comhpháirteach Eorpach sa Ríomhaireacht Ardfheidhmíochta agus sa ríomhaireacht chandamach; agus cumainn a dhéanann ionadaíocht ar a gcomheintitis agus eagraíochtaí eile atá meáite go sainráite agus go gníomhach ar thorthaí taighde agus nuálaíochta a tháirgeadh, ar chumais ríomhaireachta ardfheidhmíochta nó

ríomhaireachta candamaí a fhorbairt agus a úsáid, nó rannchuidiú chun dul i ngleic leis an mbearna scileanna agus an fios gnó a choimeád i réimse na Ríomhaireachta Ardfheidhmíochta agus na ríomhaireachta candamaí san Eoraip. Ba cheart go bhféadfadh baill nua dul isteach sa Chomhghnóthas.

- (21) Ba cheart don Aontas, do na Stáit Rannpháirteacha agus do Bhaill Phríobháideacha an Chomhghnóthais ranníocaíocht airgeadais a dhéanamh i dtreo chostais riaracháin an Chomhghnóthais.
- (22) D'fhonn seasamh ceannasach a fháil ar ais i dteicneolaíochtaí Ríomhaireachta Ardfheidhmíochta, agus éiceachóras iomlán Ríomhaireachta Ardfheidhmíochta agus ríomhaireachta candamaí a fhorbairt don Aontas, bhunaigh na páirtithe leasmhara tionsclaíochta agus taighde san Ardán Teicneolaíochta Eorpach um Ríomhaireacht Ardfheidhmíochta Comhpháirtíocht Phoiblí Phríobháideach ar bhonn conartha leis an Aontas in 2014. Is é an misean atá aige slabhra luacha den chéad scoth de theicneolaíocht Ríomhaireachta Ardfheidhmíochta a thógáil san Eoraip ar cheart dó a bheith iomaíoch ar bhonn domhanda, agus ag cothú sineirgí idir na trí phríomh-chomhpháirt den éiceachóras Ríomhaireachta Ardfheidhmíochta, eadhon forbairt teicneolaíochta, feidhmchláir agus bonneagar sár-ríomhaireachta. Nuair a bhreithnítear a shaineolas, agus an ról atá aige maidir leis na páirtithe leasmhara príobháideacha ábhartha sa Ríomhaireacht Ardfheidhmíochta a thabhairt le chéile, ba cheart go mbeadh Cumann príobháideach an Ardáin Teicneolaíochta Eorpaigh um Ríomhaireacht Ardfheidhmíochta incháilithe i gcomhair ballraíochta sa Chomhghnóthas.
- (23) D'fhonn an slabhra luacha sonraí a neartú, tógáil pobail a fheabhsú maidir le sonraí agus na forais a leagan síos le haghaidh geilleagar bríomhar sonraí-bhunaithe san Aontas, bhunaigh na páirtithe leasmhara tionsclaíochta agus taighde sa Big Data Value Association (BDVA) comhpháirtíocht phoiblí phríobháideach ar bhonn conartha leis an Aontas in 2014. Nuair a bhreithnítear a shaineolas, agus an ról atá aige maidir leis na páirtithe leasmhara príobháideacha mórshonraí ábhartha a thabhairt le chéile, ba cheart go mbeadh BDVA incháilithe i gcomhair ballraíochta sa Chomhghnóthas.
- (24) Léirigh na cumainn phríobháideacha, an tArdán Teicneolaíochta Eorpach um Ríomhaireacht Ardfheidhmíochta agus BDVA, i scríbhinn, go bhfuil siad toilteanach rannchuidiú le straitéis teicneolaíochta an Chomhghnóthais agus a gcuid saineolais a chur ag obair chun cuspóirí an Chomhghnóthais a chur i gcrích. Is iomchuí go nglacfaidh na cumainn phríobháideacha leis na Reachtanna a leagtar amach san Iarscríbhinn a ghabhann leis an Rialachán seo trí litir fhormhuinithe.
- (25) Ba cheart don Chomhghnóthas dul i ngleic go soiléir le topaicí sainithe a chuirfeadh ar chumas na dtionscal acadúil agus Eorpach trí chéile na teicneolaíochtaí is nuálaí i Ríomhaireacht Ardfheidhmíochta agus i ríomhaireacht chandamach a dhearadh, a fhorbairt agus a úsáid, agus bonneagar líonraithe slán, comhtháite agus cónasctha a bhunú ar fud an Aontais ag a mbeadh cumas den chéad scoth sa Ríomhaireacht Ardfheidhmíochta agus sa ríomhaireacht chandamach, nascacht ardluais agus feidhmchláir cheannródaíocha agus seirbhísí sonraí agus bogearraí dá eolaithe agus do phríomh-úsáideoirí eile ón tionscal, lena n-áirítear FB Manna agus an earnáil phoiblí. Ba cheart go mbeadh sé mar aidhm ag an gComhghnóthas teicneolaíochtaí agus bonneagair den chéad scoth a fhorbairt agus a úsáid, dhá rud a rachaidh i ngleic leis na riachtanais mhóra a bhíonn ag úsáideoirí eolaíochta, tionsclaíochta agus ag úsáideoirí na hearnála poiblí san Eoraip.

- (26) Ba cheart don Chomhghnóthas cúnamh a thabhairt chun an bhearna shonrach scileanna ar fud an Aontais a laghdú trí bheith ag gabháil do bhearta ardaithe feasachta agus cuidiú le heolas nua agus caipiteal daonna a thógáil.
- (27) Ag teacht leis na cuspóirí beartais sheachtraigh agus le tiomantais idirnáisiúnta an Aontais, ba cheart don Chomhghnóthas comhar a éascú idir an tAontas agus gníomhairí idirnáisiúnta trí straitéis comhair a shainiú, lena n-áirítear réimsí comhair i dtaighde agus forbairt agus forbairt scileanna a shainaithint agus a chur chun cinn agus gníomhaíochtaí a chur chun feidhme i gcás ina bhfuil tairbhe ann don dá thaobh, chomh maith lena áirithiú go mbeidh beartas rochtana ann de chumais agus d'fheidhmchláir Ríomhaireachta Ardfheidhmíochta agus ríomhaireachta candamaí faoi seach a bheidh bunaithe go príomha ar chómhálartacht.
- (28) Ba cheart go mbeadh sé mar aidhm ag an gComhghnóthas leas a bhaint as aon teicneolaíochtaí Ríomhaireachta Ardfheidhmíochta a chruthófar dá bharr san Aontas Eorpach. Ba cheart dó díriú freisin ar na hinfheistíochtaí a fhaigheann sé sna sár-ríomhairí a chosaint. Agus sin á dhéanamh, ba cheart dó bearta iomchuí a ghlacadh chun slándáil an tslabhra soláthair de theicneolaíochtaí a fhaightear a áirithiú, inar cheart go gcumhdófaí saolré iomlán na sár-ríomhairí sin.
- (29) Ba cheart don Chomhghnóthas an bealach a réiteach le haghaidh fis níos fadtéarmaí agus an chéad bhonneagar hibrideach den Ríomhaireacht Ardfheidhmíochta a thógáil san Eoraip, ag comhtháthú ailtireachtaí ríomhaireachta clasaicí le fearais ríomhaireachta candamaí. Tá tacaíocht airgeadais struchtúrach agus chomhordaithe ar leibhéal Eorpach riachtanach chun cabhrú le foirne taighde agus le tionscail na hEorpa torthaí den chéad scoth a tháirgeadh lena áirithiú go saothraítear taighde agus teicneolaíocht Eorpach go gasta agus go forleathan ar fud an Aontais, agus as sin go gcruthófar torthaí tábhachtacha don tsochaí, d'fhonn na rioscaí a ghlacfar a roinnt amach agus dul i mbun oibre le chéile trí straitéisí agus infheistíochtaí a ailíniú i dtreo an leasa choitinn san Eoraip.
- (30) D'fhonn a chuid cuspóirí maidir leis na teicneolaíochtaí is nuálaí a dhearadh, a fhorbairt agus a úsáid i Ríomhaireacht Ardfheidhmíochta agus i ríomhaireacht chandamach a bhaint amach, ba cheart don Chomhghnóthas tacaíocht airgeadais a sholáthar go háirithe i bhfoirm deontas agus soláthair tar éis glao oscailte agus iomaíoch ar thograí agus glao ar thairiscintí bunaithe ar chláir oibre bhliantúla. Ba cheart an tacaíocht airgeadais sin a dhíriú go háirithe ar chlistí cruthaithe sa mhargadh a chuireann cosc ar fhorbairt an chláir lena mbaineann, níor cheart di infheistíochtaí príobháideacha a chur de dhroim seoil agus ba cheart di éifeacht dreasachta a bheith aici sa mhéid agus go n-athraíonn sé iompar an fhaighteora.
- (31) D'fhonn a chuspóir a bhaint amach maidir le cumas nuálaíochta an tionscail a mhéadú, agus go háirithe cumas nuálaíochta na bhfiontar beag agus meánmhéide, in iarracht cuidiú chun an bhearna shonrach scileanna a laghdú, chun tacú leis an méadú ar eolas agus ar chaipiteal daonna agus chun cumais na Ríomhaireachta Ardfheidhmíochta agus na ríomhaireachta candamaí a chur in airde, ba cheart don Chomhghnóthas tacaíocht a thabhairt do lárionaid náisiúnta inniúlachta um ríomhaireacht ardfheidhmíochta a chruthú, agus go háirithe iad a líonrú agus a chomhordú, ar fud an Aontais. Ba cheart do na lárionaid inniúlachta sin seirbhísí Ríomhaireachta Ardfheidhmíochta agus ríomhaireachta candamaí a sholáthar don tionscal, don saol acadúil agus do riaracháin phoiblí nuair a éilíonn siad iad. Ba cheart dóibh go príomha rochtain ar éiceachóras nuálaíochta sa Ríomhaireacht Ardfheidhmíochta a chur chun cinn agus a chumasú, rochtain ar na sár-ríomhairí agus ar ríomhairí candamacha a

éascú, dul i ngleic leis na ganntanais shuntasacha maidir le saineolaithe teicniúla oilte trí thabhairt faoi ghníomhaíochtaí ardaithe feasachta, oiliúna agus for-rochtana, agus tabhairt faoi ghníomhaíochtaí líonraithe le páirtithe leasmhara agus le lárionaid inniúlachta eile chun nuálaíochtaí níos leithne a chothú, mar shampla trí chásanna ina n-úsáidtear an dea-chleachtas nó eispéiris cur i bhfeidhm a mhalartú agus a chur chun cinn, trína gcuid saoráidí agus eispéiris oiliúna a chomhroinnt, trí chomhfhorbairt agus malartú cód comhthreomhar, nó trí thacaíocht a thabhairt do chomhroinnt feidhmchlár agus uirlisí nuálacha le haghaidh úsáideoirí poiblí agus príobháideacha, go háirithe FBManna.

- (32) Ba cheart don Chomhghnóthas creat a bheadh dírithe ar éileamh agus spreagtha ag an úsáideoir a sholáthar agus cur chuige comhdheartha a chumasú chun seirbhís chomhtháite, chónasctha den chéad scoth de shár-ríomhaireacht agus ríomhaireacht chandamach agus bonneagar sonraí a fháil san Aontas, d'fhonn an acmhainn ríomhaireachta straitéisí a theastaíonn uathu a thabhairt d'úsáideoirí ionas go bhféadfaidh siad réitigh nuálacha, nua a fhorbairt agus dúshlán a bhaineann leis an tsochaí, leis an gcomhshaol, leis an ngeilleagar agus le slándáil a réiteach. Chun na críche sin, ba cheart don Chomhghnóthas rannchuidiú chun sár-ríomhairí den chéad scoth a fháil. Ba cheart sár-ríomhairí an Chomhghnóthais, lena n-áirítear ríomhairí candamacha, a shuiteáil i Stát Rannpháirteach ar Ballstát é.
- (33) Ba cheart don Chomhghnóthas na sár-ríomhairí agus na bonneagair sonraí go léir a mbeidh sé mar úinéir nó mar chomh-úinéir orthu a hipearnascadh le teicneolaíochtaí líonraithe úrscothacha, agus iad a chur ar fáil go forleathan ar fud an Aontais, agus ba cheart dó a bhonneagar sonraí sár-ríomhaireachta agus ríomhaireachta candamaí a idirnascadh agus a chónascadh, chomh maith le bonneagair náisiúnta, réigiúnacha agus bonneagair ríomhaireachta eile le hardán comhchoiteann. Ba cheart don Chomhghnóthas a áirithiú freisin go ndéanfar idirnascadh ar an tseirbhís chónasctha, shlán sár-ríomhaireachta agus ríomhaireachta candamaí agus ar na bonneagair sonraí leis na spásanna coiteanna sonraí Eorpacha, agus na bonneagair néil chónasctha, shlána a fôgraíodh sa Teachtaireacht ón gCoimisiún an 19 Feabhra 2020 maidir le 'Straitéis Eorpach maidir le Sonraí', le haghaidh soláthar rianúil seirbhíse do raon leathan úsáideoirí poiblí agus príobháideacha ar fud na hEorpa.
- (34) Ba cheart do Fís Eorpach agus don Chlár don Eoraip Dhigiteach rannchuidiú faoi seach chun deireadh a chur leis an mbearna taighde agus nuálaíochta laistigh den Aontas agus cumais sár-ríomhaireachta fadraoin a chur in úsáid trí shineirgí a chur chun cinn le Cistí Struchtúracha agus Infheistíochta na hEorpa (Cistí SIE). Dá bhrí sin, ba cheart don Chomhghnóthas, féachaint le hidirghníomhaíochtaí dlúithe a fhorbairt leis na Cistí SIE, lena bhféadfar cuidiú a thabhairt go sonrach chun cumais taighde agus nuálaíochta áitiúla, réigiúnacha agus náisiúnta a neartú.
- (35) Ba cheart don Chomhghnóthas creat fabhrach a sholáthar do Stáit Rannpháirteacha ar Ballstáit iad chun úsáid a bhaint as a gCistí SIE chun bonneagair Ríomhaireachta Ardfheidhmíochta agus ríomhaireachta candamaí agus sonraí a fháil agus iad a idirnascadh. Tá sé riachtanach úsáid a bhaint as Cistí SIE sa Chomhghnóthas chun seirbhís Ríomhaireachta Ardfheidhmíochta, ríomhaireachta candamaí agus bonneagar sonraí den chéad scoth a bheidh comhtháite, cónasctha, slán agus hipearnasctha a fhorbairt san Aontas, toisc go sroicheann na buntáistí a bhaineann le bonneagar den sórt sin anonn thar úsáideoirí na mBallstát. Má chinneann na Ballstáit Cistí SIE a úsáid chun rannchuidiú le costais éadála shár-ríomhairí agus ríomhairí candamacha an Chomhghnóthais, ba cheart don Chomhghnóthas sciar Chistí SIE an Aontais don

Bhallstát sin a chur san áireamh, agus gan ach sciar náisiúnta na gCistí SIE a chomhaireamh mar ranníocaíocht náisiúnta i mbuiséad an Chomhghnóthais.

- (36) Ba cheart do ranníocaíocht an Aontais ó chistí an Chláir don Eoraip Dhigiteach costais éadála sár-ríomhairí ardleibhéil, ríomhairí candamacha, sár-ríomhairí de ghrád tionsclaíoch agus sár-ríomhairí meán-raoin a chumhdach i bpáirt chun ailíniú le cuspóir an Chomhghnóthais maidir le rannchuidiú le comhthiomsú acmhainní chun an tAontas a fheistiú le sár-ríomhairí agus le ríomhairí candamacha den chéad scoth. Ba cheart do na Stáit Rannpháirteacha nó na Baill Phríobháideacha nó cuibhreannais comhpháirtithe príobháideacha costais chomhlántacha na sár-ríomhairí agus na ríomhairí candamacha sin a chumhdach. Ba cheart go mbeadh an sciar d'am rochtana an Aontais ar na sár-ríomhairí nó ar na ríomhairí candamacha sin i gcomhréir dhíreach leis an ranníocaíocht airgeadais a dhéanann an tAontas chun na sár-ríomhairí agus na ríomhairí candamacha sin a fháil, agus níor cheart níos mó ná 50 % d'am rochtana iomlán na sár-ríomhairí nó na ríomhairí candamacha sin a bheith ann.
- (37) Ba cheart an Comhghnóthas a bheith ina úinéir ar na sár-ríomhairí ardleibhéil agus ar na ríomhairí candamacha atá faighte aige. Ba cheart oibriú gach sár-ríomhaire ardleibhéil nó gach ríomhaire chandamaigh a chur ar iontaoibh eintitis óstaigh. Ba cheart go bhféadfadh an t-eintiteas óstach a bheith ionadaíocht a dhéanamh ar Stát Rannpháirteach amháin ar Ballstát é nó cuibhreannas óstach de Stáit Rannpháirteacha. Ba cheart go bhféadfadh an t-eintiteas óstach meastachán cruinn a thabhairt agus costais oibriúcháin an tsár-ríomhaire a fhíorú, trína áirithiú, mar shampla, go ndéanfar deighilt idir na feidhmeanna, agus a mhéid is féidir, deighilt fhisiceach ar shár-ríomhairí ardleibhéil nó ar ríomhairí candamacha an Chomhghnóthais agus aon chórais ríomhaireachta náisiúnta nó réigiúnacha a bhíonn á oibriú aige. Ba cheart do Bhord Rialála an Chomhghnóthais ('Bord Rialála') an t-eintiteas óstach a roghnú tar éis glao ar léiriú spéise a mheasfaidh saineolaithe neamhspleácha. A luaithe a roghnaítear eintiteas óstach, ba cheart go bhféadfadh an Stát Rannpháirteach ina bhfuil an t-eintiteas óstach bunaithe nó an Cuibhreannas óstach cinneadh a dhéanamh éileamh ar Stáit Rannpháirteacha eile a bheith páirteach agus rannchuidiú le cistiú an tsár-ríomhaire ardleibhéil nó an ríomhaire chandamaigh a bheidh le suiteáil san eintiteas óstach a roghnófar. Má théann tuilleadh Stát Rannpháirteach isteach sa Chuibhreannas óstach a roghnaíodh, ba cheart go mbeadh sé sin gan dochar d'am rochtana an Aontais ar na sár-ríomhairí. Ba cheart an rannchuidiú a dhéanann na Stáit Rannpháirteacha i gCuibhreannas óstach leis an sár-ríomhaire nó leis an ríomhaire candamach a aistriú ina sciartha d'am rochtana ar an sár-ríomhaire nó ar an ríomhaire candamach sin. Ba cheart do na Stáit Rannpháirteacha aontú eatarthu féin ar dháileadh dá sciar den am rochtana don sár-ríomhaire nó don ríomhaire candamach.
- (38) Ba cheart gurb é an Comhghnóthas a bheadh mar úinéir na sár-ríomhairí nó na ríomhairí candamacha a fhaigheann sé go dtí go dtiocfaidh laghdú ar a luach. Ba cheart go bhféadfadh an Comhghnóthas an úinéireacht sin a aistriú chuig an eintiteas óstach le haghaidh a díchoimisiúnaithe, nó a diúscartha nó aon úsáid eile. Nuair a aistrítear an úinéireacht chuig an eintiteas óstach nó nuair atá an Comhghnóthas á fhoirceannadh, ba cheart don eintiteas óstach luach iarmharach an tsár-ríomhaire nó an ríomhaire chandamaigh a aisíoc leis an gComhghnóthas.
- (39) Ba cheart gur i gcomhpháirt leis na Stáit Rannpháirteacha a gheobhadh Comhghnóthas na sár-ríomhairí meán-raoin. Ba cheart oibriú gach sár-ríomhaire meán-raoin a chur ar iontaoibh eintitis óstaigh. Ba cheart go bhféadfadh an t-eintiteas óstach ionadaíocht a dhéanamh ar Stát Rannpháirteach amháin ar Ballstát é nó cuibhreannas óstach de Stáit Rannpháirteacha. Ba cheart gurb é an Comhghnóthas a bheadh mar úinéir na coda sin

a chomhfhreagraíonn do sciar ranníocaíochta airgeadais an Aontais leis na costais éadála ó chistí an Chláir don Eoraip Dhigiteach. Ba cheart don Bhord Rialála an t-eintiteas óstach a roghnú tar éis glao ar léiriú spéise a mheasfaidh saineolaithe neamhspleácha. Ba cheart go mbeadh an sciar d'am rochtana an Aontais ar gach sár-ríomhaire meán-raoin i gcomhréir dhíreach le ranníocaíocht airgeadais an Aontais ó chistí an Chláir don Eoraip Dhigiteach agus costais éadála an tsár-ríomhaire meán-raoin sin. Ba cheart go bhféadfadh an Comhghnóthas a úinéireacht a aistriú chuig an eintiteas óstach nó nuair a dhéantar é a fhoirceannadh. Ba cheart don eintiteas óstach luach iarmharach an tsár-ríomhaire a aisíoc leis an gComhghnóthas.

- (40) Ba cheart go bhféadfadh an Comhghnóthas sár-ríomhairí de ghrád tionsclaíoch a fháil in éineacht leis na Baill Phríobháideacha nó le cuibhreannas comhpháirtithe príobháideacha. Ba cheart oibriú gach sár-ríomhaire den sórt sin a chur ar iontaoibh eintitis óstaigh reatha. Ba cheart go bhféadfadh an t-eintiteas óstach dul i gcomhlachas leis na Baill Phríobháideacha nó leis an gcuibhreannas comhpháirtithe príobháideacha chun sár-ríomhaire den sórt sin a fháil agus a oibriú. Ba cheart gurb é an Comhghnóthas a bheadh mar úinéir na coda sin a chomhfhreagraíonn do sciar ranníocaíochta airgeadais an Aontais leis na costais éadála ó chistí an Chláir don Eoraip Dhigiteach. Ba cheart don Bhord Rialála an t-eintiteas óstach agus a Bhaill Phríobháideacha nó an cuibhreannas comhpháirtithe príobháideacha a roghnú tar éis glao ar léiriú spéise a mheasfaidh saineolaithe neamhspleácha. Ba cheart go mbeadh an sciar d'am rochtana an Aontais ar sár-ríomhaire den sórt sin i gcomhréir dhíreach le ranníocaíocht airgeadais an Aontais ó chistí an Chláir don Eoraip Dhigiteach le costais éadála an tsár-ríomhaire den ghrád tionsclaíoch sin. Ba cheart go bhféadfadh an Comhghnóthas a theacht ar chomhaontú leis na Baill Phríobháideacha nó leis an gcuibhreannas comhpháirtithe príobháideacha chun sár-ríomhaire mar sin a dhíol le heintiteas eile nó chun é a dhíchoimisiúnú. Nó rud eile, ba cheart go bhféadfadh an Comhghnóthas úinéireacht sár-ríomhaire den sórt sin a aistriú chuig na Baill Phríobháideacha nó chuig an gcuibhreannas comhpháirtithe príobháideacha. Sa chás sin nó ar fhoirceannadh an Chomhghnóthais, ba cheart do na Baill Phríobháideacha nó don chuibhreannas comhpháirtithe príobháideacha luach iarmharach de sciar an Aontais den sár-ríomhaire a aisíoc leis an gComhghnóthas. Sa chás go gcinneann an Comhghnóthas agus na Baill Phríobháideacha nó an cuibhreannas comhpháirtithe príobháideacha leanúint ar aghaidh le díchoimisiúnú an tsár-ríomhaire tar éis dímheas iomlán a oibriú, ba cheart do na Baill Phríobháideacha nó don chuibhreannas comhpháirtithe príobháideacha na costais sin a chlúdach.
- (41) I gcás sár-ríomhairí de ghrád tionsclaíoch ba cheart don Chomhghnóthas riachtanais shonracha na n-úsáideoirí tionsclaíocha a chur san áireamh, mar shampla na nósanna imeachta rochtana, cáilíocht agus cineál seirbhísí, cosaint sonraí, cosaint na nuálaíochta tionsclaíche, agus maoin intleachtúil, inúsáidteacht, iontaoibh, agus ceanglais eile a bhaineann le rúndacht agus le slándáil.
- (42) Ba cheart éifeachtúlacht fuinnimh agus inbhuanaitheacht an chomhshaoil a chur san áireamh i ndearadh agus in oibriú na sár-ríomhairí a fhaigheann tacaíocht ón gComhghnóthas, ag baint úsáid mar shampla as teicneolaíocht ísealchumhachta, teicnící dinimiciúla coigilte cumhachta agus teicnící athúsáide amhail fuarú forbartha agus athchúrsáil teasa.
- (43) Ba cheart go mbeadh an úsáid a bhaintear as sár-ríomhairí an Chomhghnóthais le haghaidh feidhmchláir saoránach amháin le haghaidh úsáideoirí poiblí agus príobháideacha atá ina gcónaí, bunaithe nó lonnaithe i mBallstát nó i dtír atá comhlachaithe leis an gClár don Eoraip Dhigiteach agus le Fís Eorpach. Ba cheart am

rochtana a dheonú d'úsáideoirí de réir rialacha an bheartais rochtana arna sainiú ag an mBord Rialála. Ba cheart urraim a bheith do chomhaontuithe idirnáisiúnta freisin arna gcur i gcrích ag an Aontas san úsáid a bhaintear as na sár-ríomhairí seo.

- (44) Ba cheart go mbeadh an leithdháileadh ama rochtana a fhaigheann úsáideoirí ar shár-ríomhairí an Chomhghnóthais saor in aisce d'úsáideoirí poiblí. Ba cheart dó a bheith saor in aisce freisin d'úsáideoirí príobháideacha dá gcuid feidhmchlár a bhaineann le gníomhaíochtaí taighde agus nuálaíochta arna gcistiú ag Fís Eorpach nó ag an gClár don Eoraip Chruthaitheach, chomh maith le gníomhaíochtaí nuálacha príobháideacha FBManna, i gcás inarb iomchuí. Is ar ghlaonna oscailte ar léiriú spéise a sheolfaidh an Comhghnóthas agus a mheasfaidh saineolaithe neamhspleácha ba cheart leithdháileadh ar am rochtana den sórt sin a bhunú go príomha. Cé is moite d'úsáideoirí FBM a bhíonn ag gabháil do ghníomhaíochtaí nuálaíochta príobháideacha, ba cheart do gach úsáideoir a bhaineann tairbhe as am rochtana saor in aisce ar shár-ríomhairí an Chomhghnóthais cur chuige oscailte maidir leis an eolaíocht a ghlacadh agus an t-eolas a fhaightear tríd an rochtain sin a scaipeadh, i gcomhréir leis an Rialachán maidir le Fís Eorpach. Ba cheart an leithdháileadh ama rochtana a fhaigheann úsáideoirí le haghaidh gníomhaíochtaí eacnamaíocha seachas gníomhaíochtaí nuálaíochta FBManna (a mbíonn clistí ar leith sa mhargadh le sárú acu), a dheonú ar bhonn íoc de réir úsáide, bunaithe ar phraghsanna an mhargaidh. Ba cheart leithdháileadh ama rochtana le haghaidh gníomhaíochtaí eacnamaíocha den sórt sin a cheadú ach é a theorannú agus ba cheart don Bhord Rialála leibhéal na táille a bheith le híoc a leagan síos. Ba cheart na cearta rochtana a leithdháileadh ar bhealach trédhearcach. Ba cheart don Bhord Rialála rialacha sonracha a shainiú maidir le ham rochtana a dheonú saor in aisce, i gcás inarb iomchuí, agus gan glao ar léiriú spéise maidir le tionscnaimh a measann an tAontas nó an Bord Rialála gur tionscnaimh straitéiseacha iad. Áirítear iad seo a leanas le samplaí ionadaíocha de thionscnaimh straitéiseacha an Aontais: Ceann Scríbe an Domhain, an Tionscadal Suaitheanta d'Inchinn an Duine, an tionscnamh “1+ Milliún Géanóim”, na spásanna coiteanna sonraí Eorpacha atá ag feidhmiú i bhfearainn leasa phoiblí, agus go háirithe an spás sonraí sláinte, na Lárionaid Sármhaitheasa agus Lárionaid Inniúlachta um Ríomhaireacht Ardfheidhmíochta, na Moil Nuálaíochta Digití, srl. Ar iarraidh ón Aontas, ba cheart don Chomhghnóthas am rochtana díreach a dheonú ar bhonn sealadach nó buan do thionscnaimh straitéiseacha agus ardáin feidhmchlár reatha nó sa todhchaí dar leis atá riachtanach chun seirbhísí tacaíochta éigeandála a bhaineann le sláinte nó seirbhísí eile atá rithabhachtach a sholáthar chun leasa an phobail, do chásanna éigeandála agus bainistiú géarchéime nó do chásanna is dóigh leis an Aontas a bheith riachtanach dá shlándáil agus dá chosaint. Ba cheart cead a thabhairt don Chomhghnóthas roinnt gníomhaíochtaí eacnamaíocha teoranta a chur i gcrích chun críocha tráchtála. Ba cheart rochtain a dheonú d'úsáideoirí a bhfuil cónaí orthu, atá bunaithe nó atá lonnaithe i mBallstát de chuid an Aontais Eorpaigh nó i dtír atá i gcomhlachas leis an gClár don Eoraip Dhigiteach agus le Fís Eorpach. Ba cheart do na cearta rochtana a bheith cothrom d'aon úsáideoir agus ba cheart iad a leithroinnt ar bhealach trédhearcach. Ba cheart don Bhord Rialála na cearta rochtana ar sciar an Aontais d'am rochtana ar gach sár-ríomhaire a shainiú agus faireachán a dhéanamh air.
- (45) Leanfar ag deonú rochtana ar sciar an Aontais d'am rochtana ar réamhtheachtaithe na sár-ríomhairí eicseascálaithe agus peiteascála a fuair an Comhghnóthas a bunaíodh faoi Rialachán 2018/1488 ón gComhairle d'úsáideoirí atá bunaithe san Aontas i dtír atá comhlachaithe le Fís 2020.

- (46) Ba cheart sár-riomhairí an Chomhghnóthais a oibriú agus a úsáid i gcomhréir le Rialachán (AE) 2016/679⁵, Treoir (AE) 2002/58/CE⁶ agus Treoir (AE) 2016/943⁷.
- (47) Ba cheart do dhá chomhlacht rialachas an Chomhghnóthais a áirithiú: Bord Rialála, agus Bord Comhairleach Tionsclaíochta agus Eolaíochta. Ba cheart go mbeadh ionadaithe ón Aontas agus ó na Stáit Rannpháirteacha ar an mBord Rialála. Ba cheart an Bord Rialála a bheith freagrach as déanamh beartais straitéisigh agus as cinntí cistiúcháin a bhaineann le gníomhaíochtaí an Chomhghnóthais, lena n-áirítear na gníomhaíochtaí soláthair phoiblí uile. Ba cheart go mbeadh ionadaithe ón saol acadúil agus ón tionscal ar an mBord Comhairleach Tionsclaíochta agus Eolaíochta mar úsáideoirí agus mar sholáthróirí teicneolaíochta. Ba cheart dó comhairle neamhspleách a thabhairt don Bhord Rialála maidir leis an gclár oibre straitéiseach i gcomhair taighde agus nuálaíochta, maidir le fáil agus oibriú na sár-riomhairí faoi úinéireacht an Chomhghnóthais, maidir leis an gclár forbartha acmhainne agus gníomhaíochtaí leathnaithe agus an clár gníomhaíochtaí maidir le cónascadh, nascacht agus comhar idirnáisiúnta.
- (48) I gcás ghnáthchúraimí riaracháin an Chomhghnóthais, ba cheart cearta vótála na Stát Rannpháirteach a roinnt amach go cothrom eatarthu. I gcás na gcúraimí a chomhfhreagraíonn do bhunú cuid den chlár oibre a bhaineann leis na sár-riomhairí agus na riomhairí candamacha a fháil, roghnú an eintitis óstaigh agus gníomhaíochtaí cónasctha agus nascachta an Chomhghnóthais, ba cheart cearta vótála na Stát Rannpháirteach ar Ballstáit iad a bheith bunaithe ar phrionsabal an tromlaigh cháilithe. Na Stáit Rannpháirteacha ar tíortha iad atá comhlachaithe le Fís Eorpach, an Clár don Eoraip Dhigiteach agus an tSaoráid um Chónascadh na hEorpa, ba cheart dóibh cearta vótála a bheith acu freisin le haghaidh na ngníomhaíochtaí faoi seach a fhaigheann tacaíocht agus ba cheart dóibh imchlúdaigh bhuiséadacha a fháil ó gach ceann de na cláir sin. I gcás na gcúraimí a chomhfhreagraíonn d'fháil agus d'oibriú na sár-riomhairí agus na riomhairí candamacha, níor cheart cearta vótála a bheith ach ag na Stáit Rannpháirteacha agus ag an Aontas a thugann acmhainní ar son na gcúraimí sin.
- (49) Ba cheart ranníocaíocht airgeadais an Aontais a bhainistiú i gcomhréir leis an bprionsabal maidir le bainistíocht fóna airgeadais agus leis na rialacha ábhartha maidir le bainistíocht indéach a leagtar amach i Rialachán (AE, Euratom) 2018/1046. Ba cheart na rialacha is infheidhme don Chomhghnóthas le tabhairt faoi nósanna imeachta soláthair phoiblí a leagan síos ina chuid rialacha airgeadais.
- (50) D'fhonn éiceachóras Ríomhaireachta Ardfheidhmíochta agus ríomhaireachta candamaí atá nuálach agus iomaíoch agus lena mbaineann sármhaitheas aitheanta a chothú san Eoraip, ba cheart don Chomhghnóthas úsáid iomchuí a bhaint as na hionstraimí soláthair agus deontais, lena n-áirítear soláthar comhpháirteach, soláthar réamhthráchtála agus soláthar poiblí ar réitigh nuálacha.

⁵ Rialachán (AE) Uimh. 2016/679 ó Pharlaimint na hEorpa agus ón gComhairle an 27 Aibreán 2016 maidir le daoine nádúrtha a chosaint i ndáil le sonraí pearsanta a phróiseáil agus maidir le saorghluaiseacht sonraí den sórt sin, agus lena n-aisghairtear Treoir 95/46/CE (An Rialachán Ginearálta maidir le Cosaint Sonraí) (IO L 119, 4.5.2016, lch. 1).

⁶ Treoir 2002/58/CE ó Pharlaimint na hEorpa agus ón gComhairle an 12 Iúil 2002 maidir le sonraí pearsanta a phróiseáil agus maidir le príobháideacht a chosaint san earnáil cumarsáide leictreonaí (an Treoir um príobháideacht agus cumarsáid leictreonach) (IO L 201, 31.7.2002, lch. 37).

⁷ Treoir (AE) 2016/943 ó Pharlaimint na hEorpa agus ón gComhairle an 8 Meitheamh 2016 maidir le fios gnó agus faisnéis ghnó gan nochtadh (rúin trádála) a chosaint ar fháil, ar úsáid agus ar nochtadh neamhdhleathach (IO L 157, 15.6.2016, lch. 1).

- (51) Agus measúnú á dhéanamh ar thionchar foriomlán an Chomhghnóthais, ba cheart infheistíochtaí i ngníomhaíochtaí indíreacha ó na Baill Phríobháideacha a chur san áireamh, mar ranníocaíochtaí comhchineáil ina gcuimsítear na costais incháilithe a thabhaigh siad le linn dóibh gníomhaíochtaí a chur chun feidhme, lúide ranníocaíochtaí an Chomhghnóthais, na Stát Rannpháirteach nó aon ranníocaíocht eile ón Aontas i dtreo na gcostas sin. Agus measúnú á dhéanamh ar thionchar foriomlán an Chomhghnóthais, ba cheart infheistíochtaí i ngníomhaíochtaí eile ó na Baill Phríobháideacha a chur san áireamh, mar ranníocaíochtaí comhchineáil ina gcuimsítear na costais incháilithe a thabhaigh siad le linn dóibh na gníomhaíochtaí a chur chun feidhme, lúide ranníocaíochtaí an Chomhghnóthais, na Stát Rannpháirteach nó aon ranníocaíocht eile ón Aontas i dtreo na gcostas sin.
- (52) Chun cothrom na hiomaíochta a choimeád do gach gnóthas atá gníomhach sa mhargadh inmheánach, ba cheart cistiú a fhaightear ó Chreatchláir an Aontais a bheith i gcomhréir le prionsabail Státchabhrach chun éifeachtacht caiteachais phoiblí a áirithiú agus chun saobhadh ar an margadh a chosc, cistiú príobháideach a bhrú amach, cuir i gcás struchtúir neamhéifeachtacha margaidh a chruthú agus gnólaichtaí neamhéifeachtúla a chaomhnú, nó cultúr a chruthú ina mbítear ag brath rómhór ar fhóirdheontais.
- (53) Ba cheart do rannpháirtíocht i ngníomhaíochtaí indíreacha a chistíonn an Comhghnóthas Rialachán (AE) Uimh. xxx lena mbunaítear Fís Eorpach a chomhlíonadh. Ba cheart don Chomhghnóthas, ina theannta sin, a áirithiú go gcuirfear na rialacha sin i bhfeidhm go seasmhach bunaithe ar bhearta ábhartha arna nglacadh ag an gCoimisiún. D'fhonn cómhaoiniú iomchuí ghníomhaíochtaí indíreacha na Stát Rannpháirteach a áirithiú, i gcomhréir le Rialachán (AE) Uimh. xxx lena mbunaítear Fís Eorpach, ba cheart do na Stáit Rannpháirteacha rannchuidiú a thabhairt de mhéid atá cothrom ar a laghad leis an aisíocaíocht arna soláthar ag an gComhghnóthas maidir leis na costais incháilithe a thabhaigh tairbhithe sna gníomhaíochtaí. Chuige sin, ba cheart na rátaí cistiúcháin uasta a leagtar amach i gclár oibre bliantúil an Chomhghnóthais i gcomhréir le hAirteagal 30 de Rialachán (AE) Uimh. xxx lena mbunaítear Fís Eorpach a shocrú dá réir sin.
- (54) Ba cheart don soláthar tacaíochta airgeadais do ghníomhaíochtaí ón gClár don Eoraip Dhigiteach na rialacha i Rialachán (AE) Uimh. xxx lena mbunaítear an Eoraip Dhigiteach a chomhlíonadh.
- (55) Ba cheart don soláthar tacaíochta airgeadais do ghníomhaíochtaí ón tSaoráid um Chónascadh na hEorpa na rialacha i Rialachán (AE) Uimh. xxx lena mbunaítear an tSaoráid um Chónascadh na hEorpa a chomhlíonadh.
- (56) Ba cheart leasanna airgeadais an Aontais agus bhaill eile an Chomhghnóthais a chosaint trí bhearta comhréireacha feadh an timthrialla caiteachais, lena n-áirítear neamhrialtachtaí a chosc, a bhrath agus a fhiosrú, cistí a cailleadh, a íocadh go mícheart nó a úsáideadh go mícheart a ghnóthú agus, i gcás inarb iomchuí, pionóis airgeadais agus riaracháin a ghearradh i gcomhréir le Rialachán (AE, Euratom) 2018/1046.
- (57) Ba cheart don Chomhghnóthas feidhmiú ar bhealach oscailte agus trédhearcach agus an fhaisnéis ábhartha go léir a sholáthar ar bhonn caoithiúil chomh maith lena chuid gníomhaíochtaí a chur chun cinn, lena n-áirítear gníomhaíochtaí faisnéise agus scaipthe, le haghaidh an phobail i gcoitinne. Ba cheart rialacha nós imeachta chomhlachtaí an Chomhghnóthais a chur ar fáil go poiblí.

- (58) Chun críche an tsimplithe, ba cheart an t-ualach riaracháin a laghdú do na páirtithe uile. Ba cheart iniúchtaí dúbailte agus méideanna díréireacha doiciméad agus tuairiscithe a sheachaint.
- (59) I gcomhréir leis an Rialachán maidir le Fís Eorpach, ba cheart do Stáit Rannpháirteacha é a chur ar iontaoibh an Chomhghnóthais a ranníocaíocht lena rannpháirtithe náisiúnta i ngníomhaíochtaí indíreacha a chur chun feidhme. Ba cheart do na tairbhíthe comhaontú deontais aonair a shíniú leis an gComhghnóthas agus na rialacha in Fís Eorpach, an Clár don Eoraip Dhigiteach nó an tSaoráid um Chónascadh na hEorpa á gcomhlíonadh, lena n-áirítear an creat faoi seach le haghaidh cearta maoine intleachtúla, ag brath ar chlár an Aontais a bheith ag tabhairt tacaíochta don ghníomhaíocht deontais chomhfhreagraigh. Ba cheart don Chomhghnóthas na héilimh ar chostais a phróiseáil agus na híocaíochtaí a dhéanamh leis na tairbhíthe.
- (60) Ag glacadh leis go gcaithfidh na Stáit Rannpháirteacha rialacha dochta maidir leis an mbuiséad náisiúnta a chomhlíonadh, ba cheart é sin a chur san áireamh nuair a bheidh an Comhghnóthas ag cur a gcuid ranníocaíochtaí lena rannpháirtithe náisiúnta i ngníomhaíochtaí indíreacha chun feidhme. Chuige sin, ba cheart do na Stáit Rannpháirteacha agus don Chomhghnóthas comhaontuithe a bheidh ceangailteach ó thaobh dlí de a chur i gcrích ag gabháil ar na Stáit Rannpháirteacha méid iomlán a ranníocaíochta le gníomhaíochtaí indíreacha a íoc ar feadh shaolré an tionscnaimh. Ba cheart comhaontuithe den sórt sin a chur i gcrích i gcomthéacs an nós imeachta bhuiséadaigh bhliantúil agus chlársceidealú an Chomhghnóthais. Ba cheart don Bhord Rialála an clár oibre bliantúil a ghlacadh agus an aird chuí aige ar na comhaontuithe sin. Is ina dhiaidh sin amháin agus ag teacht le rialacha airgeadais an Chomhghnóthais, ar cheart don oifigeach údaraithe na tiomantais bhuiséadacha agus dlíthiúla a dhéanamh le haghaidh na ngníomhaíochtaí indíreacha sin.
- (61) Ba cheart d'iniúcháir inmheánach an Choimisiúin na cumhachtaí céanna a fheidhmiú maidir leis an gComhghnóthas leo sin a fheidhmítear maidir leis an gCoimisiún.
- (62) Ba cheart don Choimisiún, don Chomhghnóthas, don Chúirt Iniúcháirí agus don Oifig Eorpach Frith-Chalaoise (OLAF) agus d'Oifig an Ionchúisitheora Phoiblí Eorpaigh (EPPO) rochtain a fháil ar an bhfaisnéis riachtanach go léir agus ar an áitreabh chun iniúchadh agus imscrúduithe a dhéanamh maidir leis na deontais, na conarthaí agus na comhaontuithe atá sínithe ag an gComhghnóthas.
- (63) Ba cheart do gach glao ar thograí agus gach glao ar thairiscintí faoin Rialachán seo fad Fís Eorpach, an Chláir don Eoraip Dhigiteach agus na Saoráide um Chónascadh na hEorpa a chur san áireamh, de réir mar is iomchuí, ach amháin i gcásanna a bhfuil údar cuí leo. Ba cheart na nósanna imeachta soláthair go léir maidir le sár-ríomhairí agus ríomhairí candamacha an Chomhghnóthais a fháil a chur i gcrích nuair a bheidh forálacha infheidhme an Chláir don Eoraip Dhigiteach comhlíonta.
- (64) Ba cheart don Choimisiún meastóireacht eatramhach agus an mheastóireacht deiridh a dhéanamh ar an gComhghnóthas agus cúnamh aige ó shaineolaithe neamhspleácha. De ghrá na trédhearcachta, ba cheart tuarascáil na saineolaithe neamhspleácha ábhartha a chur ar fáil go poiblí, i gcomhréir leis na rialacha is infheidhme.
- (65) Ós rud é nach féidir leis na Ballstáit cuspóirí an Rialacháin seo, eadhon na cumais taighde agus nuálaíocht a neartú, forbairt acmhainne na sár-ríomhaireachta agus gníomhaíochtaí leathnaithe, cónascadh, nascacht agus comhar idirnáisiúnta agus sár-ríomhairí de scoth an domhain a fháil, agus rochtain ar sheirbhís Ríomhaireachta Ardfheidhmíochta, ríomhaireachta candamaí agus ar bhonneagar sonraí ar fud an

Aontais trí bhíthin Comhghnóthais, a ghnóthú go leordhóthanach, agus gur fearr is féidir dá bhrí sin, d'fhoill dúbail gan ghá a sheachaint, mais chriticiúil a chothú agus a áirithiú go n-úsáidfear airgeadas poiblí ar bhealach barrmhaith, iad a bhaint amach ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun na cuspóirí sin a ghnóthú.

TAR ÉIS AN RIALACHÁN SEO A GHLACADH:

Airteagal 1

Bunú

- (1) Ar mhaithe leis an tionscnamh maidir leis an Ríomhaireacht Ardfeidhmíochta Eorpach a chur chun feidhme, bunaítear leis seo Comhghnóthas de réir bhrí Airteagal 187 den Chonradh ar Fheidhmiú an Aontais Eorpaigh (CFAE) ('Comhghnóthas Ríomhaireachta Ardfeidhmíochta Eorpach', an 'Comhghnóthas').
- (2) D'fhoill fad Chlár Réime um Thaighde agus um Nuálaíocht na hEorpa (Fís Eorpach) arna bhunú le Rialachán (AE) Uimh. xxx, an Chláir don Eoraip Dhigiteach arna bhunú le Rialachán (AE) Uimh. xxx, agus na Saoráide um Chónascadh na hEorpa (Saoráid um Chónascadh na hEorpa) arna bunú le Rialachán (AE) Uimh. xxx a chur san áireamh, déanfar an glao ar thograí agus an glao ar thairiscintí faoin Rialachán seo a sheoladh faoin 31 Nollaig 2027. I gcásanna a bhfuil údar cuí leo, féadfar glao ar thograí nó glao ar thairiscintí a sheoladh faoin 31 Nollaig 2028.
- (3) Beidh pearsantacht dhlítheanach ag an gComhghnóthas. I ngach Ballstát, beidh an inniúlacht dhlítheanach aige is fairsinge atá ar fáil do dhaoine dlítheanacha faoin dhlíthe an Bhallstáit sin. Féadfaidh sé, go háirithe, maoin shochorraithe agus maoin dhochorraithe a fháil nó a dhiúscairt agus féadfaidh sé a bheith ina pháirtí in imeachtaí dlíthiúla.
- (4) Beidh suíochán an Chomhghnóthais lonnaithe i Lucsamburg.
- (5) Leagtar amach Reachtanna an Chomhghnóthais ('na Reachtanna') san Iarscríbhinn.

Airteagal 2

Sainmhínithe

Chun críocha an Rialacháin seo, tá feidhm ag na sainmhínithe seo a leanas:

- (1) ciallaíonn 'tástáil inghlacthachta' tástáil a dhéantar chun a chinneadh cibé an gcomhlíonann sár-ríomhaire EuroHPC sonraíocht an chórais;
- (2) ciallaíonn 'am rochtana' tréimhse ríomhaireachta sár-ríomhaire a chuirtear ar fáil d'úsáideoir nó do ghrúpa úsáideoirí chun a gcláir ríomhaireachta a chur i gcrích;
- (3) ciallaíonn 'eintiteas cleamhnaithe' aon eintiteas dlíthiúil mar a shainmhínítear in Airteagal 187(1) de Rialachán (AE, Euratom) 2018/1046;
- (4) Ciallaíonn 'Ionad Barr Feabhais' sa Ríomhaireacht Ardfeidhmíochta tionscnamh chun an úsáid a bhaintear as cumais ríomhaireachta feidhmíochta foircní atá ar na bacáin a chur chun cinn, ionad a chuireann ar chumas pobail úsáideoirí i gcomhar le páirtithe leasmhara eile sa Ríomhaireacht Ardfeidhmíochta méadú ó scála a

dhéanamh ar chóid chomhthreomhara reatha i dtreo feidhmíocht eicseascálaithe agus scálaithe fhoircnigh;

- (5) is cur chuige comhchoiteann é an ‘comhdhearadh’ idir soláthróirí agus úsáideoirí teicneolaíochta a bhíonn ag gabháil do phróiseas deartha ar bhonn comhoibritheach atriallach chun teicneolaíocht, feidhmchlár agus córais nua a fhorbairt;
- (6) ciallaíonn ‘Lárionad Inniúlachta’ um Ríomhaireacht Ardfheidhmíochta eintiteas dlíthiúil a bhunaítear i Stát Rannpháirteach a sholáthraíonn rochtain de réir éilimh d’úsáideoirí ón tionscal, lena n-áirítear FBManna, lucht acadúil, agus riaracháin phoiblí ar na sár-ríomhairí agus ar na teicneolaíochtaí, uirlisí, feidhmchláir agus seirbhísí is déanaí sa Ríomhaireacht Ardfheidhmíochta, agus a thairgeann saineolas, scileanna, oiliúint, líonrú agus for-rochtain;
- (7) ciallaíonn ‘coinbhleacht leasa’ cás a bhaineann le gníomhaí airgeadais nó duine eile dá dtagraítear in Airteagal 61 de Rialachán (AE) Uimh. 2018/1046;
- (8) ciallaíonn ‘comheintiteas’ eintiteas ina gcuimsítear Ball Príobháideach den Chomhghnóthas, de bhun reachtanna gach Baill Phríobháidigh;
- (9) ciallaíonn ‘Cuibhreannas comhpháirtithe príobháideacha’ cumann eintiteas dlíthiúil san Eoraip a thagann le chéile ar mhaithe le sár-ríomhaire de ghrád tionsclaíoch a fháil go comhpháirteach in éineacht leis an gComhghnóthas Ríomhaireachta Ardfheidhmíochta Eorpach; féadfaidh duine amháin nó níos mó de na comhpháirtithe príobháideacha seo a bheith rannpháirteach i mBaill Phríobháideacha an Chomhghnóthais.
- (10) ciallaíonn ‘sár-ríomhaire EuroHPC’ aon chóras ríomhaireachta atá faoi úinéireacht iomlán an Chomhghnóthais nó atá faoi chomhúinéireacht le Stáit Rannpháirteacha eile, le Baill Phríobháideacha nó le cuibhreannas comhpháirtithe príobháideacha. Is féidir leis an sár-ríomhaire EuroHPC a bheith ina shár-ríomhaire clasaiceach (sár-ríomhaire ardleibhéil, sár-ríomhaire de ghrád tionsclaíoch, nó sár-ríomhaire meán-raoin), ina ríomhaire clasaiceach-candamach hibrídeach, ina ríomhaire candamach nó ina ionsamhlóir candamach;
- (11) ciallaíonn ‘eicsea-scála’ leibhéal feidhmíochta atá ábalta 10 i gcumhacht 18 n-oibríocht sa soicind a dhéanamh (nó 1 eicsea-Flap);
- (12) ciallaíonn ‘sár-ríomhaire ardleibhéil’ córas ríomhaire den chéad scoth a forbraíodh leis an teicneolaíocht is airde a bhíonn ar fáil ag pointe ama ar leith agus a bhaineann leibhéil feidhmíochta eicseascálaithe nó níos faide (i.e. iar-eicseascálaithe) amach i gcás feidhmchlár a théann i ngleic le fadhbanna níos casta;
- (13) ciallaíonn ‘cuibhreannas óstach’ grúpa Stát Rannpháirteach, Ball Príobháideach nó cuibhreannas comhpháirtithe príobháideacha atá aontaithe ar rannchuidiú chun sár-ríomhaire EuroHPC a fháil agus a oibriú, lena n-áirítear aon eagraíocht a dhéanann ionadaíocht ar na Stáit Rannpháirteacha sin;
- (14) ciallaíonn ‘eintiteas óstach’ eintiteas dlíthiúil ina n-áirítear saoráidí chun sár-ríomhaire EuroHPC a óstáil agus a oibriú agus atá bunaithe i Stát Rannpháirteach ar Ballstát é;
- (15) ciallaíonn ‘hipearnasccha’ cumarsáid atá in ann sonraí a aistriú ag 10 i gcumhacht 12 ghiotán sa soicind (1 teirighiotán sa soicind) nó thairis sin;

- (16) ciallaíonn ‘sár-ríomhaire de ghrád tionsclaíoch’ sár-ríomhaire a dearadh go sonrach le ceanglais slándála, rúndachta agus sláine sonraí d’úsáideoirí tionsclaíocha atá níos déine ná mar a bhíonn i gceist le húsáid eolaíoch;
- (17) ciallaíonn ‘ranníocaíochtaí ilchineáil i leith gníomhaíochtaí indíreacha’ arna gcistiú ó Fís Eorpach ranníocaíochtaí ón Stát Rannpháirteach nó ó Bhaill Phríobháideacha an Chomhghnóthais nó a gcomheintitis nó a n-eintitis chleamhnaithe, ina gcuimsítear na costais incháilithe a thabhaigh siad chun gníomhaíochtaí indíreacha a chur chun feidhme lúide ranníocaíocht an Chomhghnóthais sin, Stáit Rannpháirteacha an Chomhghnóthais sin agus aon ranníocaíocht eile de chuid an Aontais do na costais sin;
- (18) ciallaíonn ‘ranníocaíochtaí ilchineáil i leith gníomhaíochtaí’ arna gcistiú ón gClár don Eoraip Dhigiteach nó ón tSaoráid um Chónascadh na hEorpa ranníocaíochtaí ón Stát Rannpháirteach nó ó Bhaill Phríobháideacha an Chomhghnóthais nó a gcomheintitis nó a n-eintitis chleamhnaithe, ina gcuimsítear na costais incháilithe a thabhaigh siad chun cuid de ghníomhaíochtaí an Chomhghnóthais a chur chun feidhme lúide ranníocaíocht an Chomhghnóthais sin, Stáit Rannpháirteacha an Chomhghnóthais sin agus aon ranníocaíocht eile de chuid an Aontais leis na costais sin;
- (19) ciallaíonn ‘sár-ríomhaire meán-raoin’ sár-ríomhaire den chéad scoth lena ngabhann ord amháin ar a mhéad de leibhéal feidhmíochta dearbhmhéide níos ísle ná sár-ríomhaire ardleibhéil;
- (20) ciallaíonn ‘lárionad náisiúnta inniúlachta um ríomhaireacht ardfeidhmíochta’ eintiteas dlíthiúil atá bunaithe i Stát Rannpháirteach ar Ballstát é, a bhfuil ceangal aige le lárionad náisiúnta sár-ríomhaireachta an Bhallstáit sin, a sholáthraíonn rochtain de réir éilimh d’úsáideoirí ón tionscal, lena n-áirítear FBManna, lucht acadúil, agus riaracháin phoiblí ar na sár-ríomhairí agus ar na teicneolaíochtaí, na huirlisí, na feidhmchláir agus na seirbhísí Ríomhaireachta Ardfheidhmíochta is déanaí, agus a thairgeann saineolas, scileanna, oiliúint, líonrú agus for-rochtain;
- (21) ciallaíonn ‘Stát breathnóireachta’ tír atá incháilithe chun a bheith rannpháirteach i ngníomhaíochtaí an Chomhghnóthais arna chistiú ag Fís Eorpach nó ag an gClár don Eoraip Dhigiteach nach Stát Rannpháirteach é;
- (22) ciallaíonn ‘Stát Rannpháirteach’ tír atá ina ball den Chomhghnóthas;
- (23) ciallaíonn ‘leibhéal feidhmíochta’ líon na n-oibríochtaí snámhphointe in aghaidh an tsoicind (flapanna) is féidir le sár-ríomhaire a dhéanamh;
- (24) ciallaíonn ‘Ball Príobháideach’ aon Bhall den Chomhghnóthas seachas an tAontas nó na Stáit Rannpháirteacha;
- (25) is gléas ríomhaireachta é ‘ríomhaire candamach’ a bhaineann leas as na dlíthe a bhaineann le meicnic chandamach chun tascanna áirithe ar leith a réiteach ag úsáid níos lú acmhainní ríomhaireachta dá bhrí sin ná mar a úsáideann ríomhairí clasaiceacha;
- (26) ciallaíonn ‘ionsamhlóir candamach’ gléas candamach atá fíor-inrialaithe lena féidir léargais a fháil ar airíonna córas candamach casta nó fadhbanna ríomhaireachta sonracha nach mbíonn fáil ag ríomhairí clasaiceacha orthu a réiteach;
- (27) ciallaíonn ‘slándáil an tsabhra soláthair’ i gcás sár-ríomhaire EuroHPC na bearta a áireofar nuair a bheidh soláthróir an tsár-ríomhaire sin á roghnú chun a áirithiú go mbeidh comhpháirteanna, teicneolaíochtaí, córais agus fios gnó ar fáil, a bheidh

riachtanach chun an sár-ríomhaire sin a fháil agus a oibriú; áirítear leis sin bearta chun na rioscaí fadtéarmacha a bhaineann le briseadh faoi dheoidh i soláthar na gcomhpháirteanna, na teicneolaíochta agus na gcóras sin a mhaolú, lena n-áirítear athruithe ar phraghsanna nó feidhmíocht níos ísle nó foinsí soláthair eile. Cumhdaítear saolré iomlán an tsár-ríomhaire EuroHPC le slándáil an tslabhra soláthair.

- (28) ciallaíonn ‘Clár Oibre Straitéiseach maidir le Taighde agus Nuálaíocht’ an doiciméad a sholáthair na Baill Phríobháideacha ina gcumhdaítear tréimhse Fís Eorpach ina sainaithnítear na príomhthosaíochtaí agus na teicneolaíochtaí agus na nuálaíochtaí is gá chun cuspóirí an Chomhghnóthais a bhaint amach;
- (29) ciallaíonn ‘sár-ríomhaireacht’ ríomhaireacht ag leibhéal feidhmíochta ina n-éilítear comhtháthú ollmhór na ngnéithe ríomhaireachta aonair, lena n-áirítear comhpháirteanna candamacha, chun fadhbanna a réiteach nach féidir le gnáthchórais ríomhaireachta a láimhseáil;
- (30) ciallaíonn ‘costas iomlán úinéireachta’ sár-ríomhaire EuroHPC na costais éadála móide na costais oibriúcháin, lena n-áirítear cothabháil, go dtí go n-aistrítear úinéireacht an tsár-ríomhaire chuig an eintiteas óstach nó go dtí go ndíoltar é, nó go dtí go ndéantar díchoimisiúnú ar an sár-ríomhaire gan úinéireacht a aistriú;
- (31) ciallaíonn ‘clár oibre’ an doiciméad dá dtagraítear i bpointe (20) d’Airteagal 2 de Rialachán (AE) Uimh. xxx lena mbunaítear Fís Eorpach nó, i gcás inarb ábhartha, an doiciméad a fheidhmíonn freisin mar an clár oibre dá dtagraítear in Airteagal xxx de Rialachán (AE) Uimh. xxx lena mbunaítear an Clár don Eoraip Dhigiteach, nó in Airteagal xxx de Rialachán (AE) Uimh. xxx lena mbunaítear an tSaoráid um Chónascadh na hEorpa.

Airteagal 3

Misean agus cuspóirí

- (1) Beidh sé mar mhisean ag an gComhghnóthas seirbhís sár-ríomhaireachta agus ríomhaireachta candamaí agus éiceachóras bonneagar sonraí den chéad scoth a bheidh cónasctha, slán agus hipearnasctha a fhorbairt, a úsáid, a leathnú agus a chothú san Aontas; tacú le táirgeadh córas sár-ríomhaireachta nuálach agus iomaíoch bunaithe ar shlabhra soláthair lena n-áirítear comhpháirteanna, teicneolaíochtaí agus eolas a chuirfidh teorainn leis an mbaol bristí agus lena bhforbrófar raon leathan feidhmchlár a bheidh barrfheabhsaithe le haghaidh na gcóras sin; agus, an úsáid a bhainfear as an mbonneagar sár-ríomhaireachta sin a leathnú amach chuig líon mór úsáideoirí poiblí agus príobháideacha, agus tacú le forbairt príomhscileanna le haghaidh eolaíochta agus tionsclaíochta na hEorpa.
- (2) Is iad seo a leanas na cuspóirí foriomlána a bheidh ag an gComhghnóthas:
 - (a) rannchuidiú le Rialachán (AE) Uimh. xxx lena mbunaítear Fís Eorpach agus go háirithe Airteagal 3 de a chur chun feidhme, chun tionchar eolaíoch, eacnamaíoch, comhshaoil, teicneolaíoch agus sochaíoch a chur ar fáil ó infheistíochtaí an Aontais i dtaighde agus i nuálaíocht, d’fhonn boinn eolaíochta agus teicneolaíochta an Aontais a neartú, tosaíochtaí straitéiseacha an Aontais a bhaint amach, rannchuidiú chun cuspóirí agus beartaí an Aontais Eorpaigh a chur i gcrích, agus cabhrú chun dul i ngleic le dúshlán dhomhanda, lena n-áirítear na Spriocanna Forbartha Inbhuanaithe ach cloí le prionsabail Chlár Oibre 2030 agus Chomhaontú Pháras;

- (b) dlúthchomhar a fhorbairt agus comhordú a áirithiú le Comhpháirtíochtaí Eorpacha eile, lena n-áirítear trí ghlaonna comhpháirteacha, chomh maith le sineirgí a lorg le gníomhaíochtaí agus le cláir ábhartha ar leibhéal an Aontais, ar leibhéal náisiúnta, agus ar leibhéal réigiúnach, go háirithe leo sin a thacaíonn leis an úsáid atáthar a bhaint as réitigh nuálacha, forbairt oideachais agus réigiúnach, i gcás inarb ábhartha;
 - (c) bonneagar sár-ríomhaireachta agus sonraí hipearnasctha den chéad scoth a bheidh comhtháite, dírithe ar éileamh agus dírithe ar riachtanais an úsáideora a fhorbairt, a úsáid, a leathnú agus a chothabháil san Aontas;
 - (d) an bonneagar sár-ríomhaireachta agus sonraí hipearnasctha a chónascadh agus é a idirnascadh leis na spásanna sonraí Eorpacha agus le héiceachóras néil chun seirbhísí ríomhaireachta agus sonraí a sholáthar do raon leathan úsáideoirí poiblí agus príobháideacha san Eoraip;
 - (e) éiceachóras sár-ríomhaireachta agus sonraí fíor-iomaíoch agus nuálach san Eoraip a fhorbairt tuilleadh agus tacú leis, rud a rannchuideoidh le seasamh agus le neamhspleáchas teicneolaíochta an Aontais sa gheilleagar digiteach, a bheidh ábalta teicneolaíochtaí agus ailtireachtaí ríomhaireachta a tháirgeadh go neamhspleách agus iad a chomhtháthú ar phríomhchórais ríomhaireachta, agus feidhmchláir forbartha a bheidh barrfheabhsaithe le haghaidh na gcóras sin;
 - (f) an úsáid a bhaintear as córais sár-ríomhaireachta a leathnú agus príomhscileanna a fhorbairt a theastaíonn ó eolaíocht agus tionscal na hEorpa.
- (3) Rannchuideoidh an Comhghnóthas chun leasanna an Aontais a chosaint nuair a bheidh sár-ríomhairí á soláthar agus tacóidh sé le forbairt teicneolaíochtaí, córais agus feidhmchláir Ríomhaireachta Ardfheidhmíochta. Cumasóidh sé cur chuige comhdhearaidh chun sár-ríomhairí den chéad scoth a fháil, agus tabharfaidh sé cosaint ag an am céanna do shlándáil shlabhra soláthair na dteicneolaíochtaí agus na gcóras a gheofar. Rannchuideoidh sé le neamhspleáchas teicneolaíochta an Aontais trí thacaíocht a thabhairt d'fhorbairt teicneolaíochtaí agus feidhmchlár a atreiseoidh an slabhra soláthair i dteicneolaíocht Ríomhaireachta Ardfheidhmíochta na hEorpa agus cuirfidh sé a gcomhtháthú i gcórais sár-ríomhaireachta chun cinn, córais a théann i ngleic le líon mór riachtanas sa tsochaí agus sa tionscal.

Airteagal 4

Colún gníomhaíochta

- (1) Cuirfidh an Comhghnóthas an misean dá dtagraítear in Airteagal 3 chun feidhme de réir na gcolún gníomhaíochtaí seo a leanas:
 - (a) An colún riaracháin, ag cumhdach na ngníomhaíochtaí ginearálta a bhainfidh le hoibriú agus le bainistiú an Chomhghnóthais.
 - (b) An colún bonneagair, ag cuimsiú na ngníomhaíochtaí chun an bonneagar sár-ríomhaireachta, ríomhaireachta candamaí agus sonraí hipearnasctha agus slán den chéad scoth a fháil, a úsáid, agus a oibriú, lena n-áirítear glacadh agus úsáid chórasach na dtorthaí taighde agus nuálaíochta a ghintear san Aontas a chur chun cinn.
 - (c) An colún le haghaidh chónaidhm na seirbhísí sár-ríomhaireachta, ag cumhdach na ngníomhaíochtaí go léir chun rochtain a sholáthar ar fud an Aontais ar acmhainní agus seirbhísí sár-ríomhaireachta agus sonraí slána ar fud na hEorpa

don phobal taighde agus eolaíochta, don tionscal (lena n-áirítear FBManna) agus don earnáil phoiblí. Áirítear na nithe seo a leanas go háirithe leis sin:

- (i) tacaíocht d'idirasc na n-acmhainní Ríomhaireachta Ardfheidhmíochta, ríomhaireachta candamaí agus sonraí atá faoi úinéireacht iomlán nó i bpáirt úinéireacht an Chomhghnóthais Ríomhaireachta Ardfheidhmíochta Eorpaigh nó á gcur ar fáil ag na Stáit Rannpháirteacha ar bhonn deonach;
 - (ii) tacaíocht d'idirasc na mbonneagar sár-ríomhaireachta agus ríomhaireachta candamaí le spásanna coiteanna sonraí Eorpacha an Aontais, agus bonneagair néil chónasctha, shlána;
 - (iii) tacaíocht d'fhorbairt, fáil agus oibriú ardáin le haghaidh cónascadh rianúil agus soláthar seirbhíse slán do sheirbhís sár-ríomhaireachta agus ríomhaireachta candamaí agus bonneagar sonraí, lena mbunaítear pointe rochtana ilfhreastail le haghaidh aon seirbhís sár-ríomhaireachta nó sonraí arna mbainistiú ag an gComhghnóthas, ag tabhairt pointe iontrála aonair d'aon úsáideoir.
- (d) An colún teicneolaíochta, ag dul i ngleic leis na gníomhaíochtaí chun tacú le clár oibre uailmhianach i gcomhair taighde agus nuálaíochta chun éiceachóras sár-ríomhaireachta iomaíoch agus nuálach den chéad scoth a fhorbairt, agus a gcomhtháthú i gcórais ríomhaireachta, ag cumhdach an tslabhra soláthair eolaíochta agus tionsclaíochta iomlán, chun neamhspleách teicneolaíochta an Aontais a áirithiú. Díreofar ar theicneolaíochtaí Ríomhaireachta Ardfheidhmíochta atá tíosach ar fhuinneamh. Rachaidh na gníomhaíochtaí i ngleic leo seo inter alia:
- i) comhpháirteanna micrea-phróiseála ísealchumhachta, agus teicneolaíochtaí gaolmhara amhail algartaim nua, cóid bhogearraí, uirlisí, agus timpeallachtaí;
 - ii) paraidímí ríomhaireachta atá ag teacht chun cinn agus a gcomhtháthú i bpríomhchórais sár-ríomhaireachta, lena n-áirítear córais Ríomhaireachta Ardfheidhmíochta agus ríomhaireachta candamaí trí chur chuige bunaithe ar comhdhearadh. Nascfar na teicneolaíochtaí sin le forbairt, fáil agus úsáid na sár-ríomhairí ardleibhéil, lena n-áirítear ríomhairí candamacha, agus na mbonneagar.
 - iii) teicneolaíochtaí agus córais chun córais sár-ríomhaireachta chlasaiceacha a idirascadh agus a oibriú le teicneolaíochtaí ríomhaireachta comhlántacha eile, amhail ríomhaireacht néaramorfach nó chandamach agus a n-oibriú éifeachtach a áirithiú.
- (e) An colún feidhmchlár, ag dul i ngleic le gníomhaíochtaí chun an tsármhaitheas Eorpach a bhaint amach agus a chothabháil i bpríomh-fheidhmchláir agus cóid ríomhaireachta agus sonraí agus le haghaidh eolaíochta, an tionscail (lena n-áirítear FBManna) agus na hearnála poiblí, lena n-áirítear;
- i) feidhmchláir le haghaidh úsáideoirí poiblí agus príobháideacha a bhaineann leas as cumais na sár-ríomhairí ardleibhéil agus a gcoinbhéirseacht le hardteicneolaíochtaí digiteacha amhail intleacht shaorga, anailísíocht sonraí ardfheidhmíochta, teicneolaíochtaí néil, srl., trí chóid agus feidhmchláir Ríomhaireachta Ardfheidhmíochta-chumasaithe, mórscála atá ag teacht chun cinn sa mhargadh a chomhdhearadh, a fhorbairt agus a bharrfheabhsú;

- ii) tacaíocht a thabhairt, i measc rudaí eile, do Lárionaid Sármhaitheasa i bhfeidhmchláir Ríomhaireachta Ardfheidhmíochta agus do thaispeántóirí píolótacha mórsála agus binsí tástála Ríomhaireachta Ardfheidhmíochta-chumasaithe le haghaidh feidhmchláir agus seirbhísí mórshonraí i raon leathan earnálacha eolaíochta agus tionsclaíochta.
- (f) An colún maidir le húsáid agus scileanna a leathnú, agus é mar aidhm aige an tsármhaitheas a chothú in úsáid agus scileanna sár-ríomhaireachta, ríomhaireachta candamaí agus sonraí ina gcuirtear sineirgí le ríomhchláir agus le hionstraimí eile san áireamh, go háirithe an Clár don Eoraip Dhigiteach, an úsáid eolaíoch agus thionsclaíoch a bhaintear as acmhainní sár-ríomhaireachta agus feidhmchláir sonraí a leathnú agus an rochtain agus an úsáid a bhaineann an tionscal as bonneagair sár-ríomhaireachta agus sonraí i gcomhair na nuálaíochta a chur in oiriúint do riachtanais tionsclaíochta; agus pobal eolaíoch eolach ceannródaíoch agus lucht oibre oilte a sholáthar don Eoraip i gcomhair ceannaireacht eolaíochta agus chun claochlú digiteach a dhéanamh ar an tionscal, lena n-áirítear tacaíocht agus líonrú na Lárionad Náisiúnta Inniúlachta um Ríomhaireacht Ardfheidhmíochta agus na nIonad Barr Feabhais um Ríomhaireacht Ardfheidhmíochta
- (g) Comhar idirnáisiúnta: Ag teacht leis na cuspóirí beartais sheachtraigh agus le tiomantais idirnáisiúnta an Aontais, gníomhaíochtaí atá ábhartha do chur chun cinn an chomhair idirnáisiúnta sa tsár-ríomhaireacht a shainiú, a chur chun feidhme agus a bheith rannpháirteach iontu chun dúshlán dhomhanda eolaíochta agus shochaíocha a réiteach, agus iomaíochas éiceachóras soláthair agus úsáideora na Ríomhaireachta Ardfheidhmíochta san Eoraip á chur chun cinn ag an am céanna.
- (2) I dteannta na ngníomhaíochtaí a liostaítear i mír 1, féadfar é a chur ar iontaoibh an Chomhghnóthais cúraimí breise a chur chun feidhme i gcás ina ndéantar cistiú carnach, comhlántach nó comhcheangailte ar chistiú idir cláir an Aontais i gcomhréir le clár oibre ábhartha an Choimisiúin.

Airteagal 5

Ranníocaíocht airgeadais an Aontais

- (1) Is mar seo a leanas a dháilfear ranníocaíocht airgeadais an Aontais leis an gComhghnóthas lena n-áirítear leithreasuithe EFTA suas le EUR [XXXXXX], lena n-áirítear suas le EUR [XXXXXX] le haghaidh costas riaracháin :
 - (a) suas le EUR [XXXXXX] ó Fís Eorpach [cinnfear an buiséad ag céim níos déanaí de réir Phleanáil agus Chlársceidealú Straitéiseach Fís Eorpach];
 - (b) suas le EUR [2 400 000 000] ón gClár don Eoraip Dhigiteach;
 - (c) suas le EUR [200 000 000] ón tSaoráid um Chónascadh na hEorpa.
- (2) Ranníocaíocht airgeadais an Aontais, rud dá dtagraítear i mír 1, is ó leithreasuithe i mbuiséad ginearálta an Aontais a dhéanfar í a íoc, leithreasuithe a leithdháiltear ar an gclár sonrach.
- (3) Cistí breise an Aontais a chomhlánóidh an ranníocaíocht dá dtagraítear i mír 1, féadfar iad a leithdháileadh ar an gComhghnóthas chun tacú le gníomhaíochtaí le haghaidh taighde agus nuálaíochta agus chun réitigh nuálacha a chur ag obair.

- (4) Ranníocaíochtaí ó chláir an Aontais a chomhfhreagraíonn do ghníomhaíochtaí breise atá curtha ar iontaoibh an Chomhghnóthais i gcomhréir le mír 3 den Airteagal seo, is ranníocaíochtaí iad nach gcuirfear san áireamh nuair a bheidh ranníocaíocht airgeadais uasta an Aontais á ríomh.
- (5) Cistí breise ón Aontas a chomhlánóidh an ranníocaíocht dá dtagraítear i mír 1, féadfar na cistí sin a leithdháileadh ar an Chomhghnóthas ó Thíortha Comhlachaithe Fís Eorpach, ón gClár don Eoraip Dhigiteach agus ón tSaoráid um Chónascadh na hEorpa de réir na gcomhaontuithe comhlachais.
- (6) Úsáidfear ranníocaíocht airgeadais an Aontais dá dtagraítear i bpointe (a) de mhír 1 don Chomhghnóthas chun tacaíocht airgeadais a chur ar fáil do ghníomhaíochtaí indíreacha mar a shainmhínítear in Airteagal xxx den Rialachán maidir le Fís Eorpach, ag comhfhreagairt don chlár oibre taighde agus nuálaíochta.
- (7) Úsáidfear ranníocaíocht airgeadais an Aontais dá dtagraítear i bpointe (b) de mhír 1 i gcomhair forbairt acmhainní ar fud an Aontais ar fad, lena n-áirítear Ríomhairí Ardfheidhmíochta, ríomhairí candamacha nó ionsamhlóirí candamacha a fháil agus a oibriú, an tseirbhís Ríomhaireachta Ardfheidhmíochta agus ríomhaireachta candamaí agus bonneagar sonraí a chónascadh agus a úsáid a leathnú, agus forbairt ardscileanna agus oiliúna.
- (8) Déanfar ranníocaíocht airgeadais an Aontais dá dtagraítear i bpointe (c) de mhír 1 a íoc ó na leithreasuithe i mbuiséad ginearálta an Aontais a leithdháiltear don tSaoráid um Chónascadh na hEorpa agus úsáidfear í le haghaidh idirnascaidh na n-acmhainní Ríomhaireachta Ardfheidhmíochta agus sonraí agus chun bonneagar Ríomhaireachta Ardfheidhmíochta agus sonraí uile-Eorpach a bheidh comhtháite agus hipearnasctha a chruthú.

Airteagal 6

Ranníocaíochtaí eile an Aontais

Seachas na ranníocaíochtaí dá dtagraítear in Airteagal 5(1), ranníocaíochtaí is cuid de chómhaoiniú an Aontais le clár atá á chur chun feidhme ag ceann de na Stáit Rannpháirteacha, ní chuirfear ranníocaíochtaí ó chláir an Aontais san áireamh nuair atá ranníocaíocht airgeadais uasta an Aontais á ríomh, rud dá dtagraítear in Airteagal 5.

Airteagal 7

Ranníocaíochtaí a dhéanann baill eile seachas an tAontas féin

- (1) Déanfaidh na Stáit Rannpháirteacha ranníocaíocht iomlán a bheidh cothrom ar a laghad le méid ranníocaíocht an Aontais dá dtagraítear in Airteagal 5 den Rialachán seo, lena n-áirítear suas le ranníocaíocht EUR [XXXXX] le haghaidh costais riaracháin [cothrom le méid ranníocaíocht an Aontais le haghaidh costais riaracháin dá dtagraítear in Airteagal 5 den Rialachán seo]. Socróidh na Stáit Rannpháirteacha eatarthu féin conas a sholáthróidh siad a ranníocaíocht chomhchoiteann.
- (2) Déanfaidh Baill Phríobháideacha an Chomhghnóthais ranníocaíochtaí a gcomheintiteas nó a n-eintiteas cleamhnaithe nó déanfaidh siad socrú i gcomhair na ranníocaíochtaí ar luach EUR [XXXXX] ar a laghad leis an gComhghnóthas, lena n-áirítear suas le EUR [XXXXX] le haghaidh costas riaracháin [cothrom le 22.22 % de mhéid ranníocaíocht an Aontais le haghaidh costais riaracháin dá dtagraítear in Airteagal 5 den Rialachán seo].

- (3) Na ranníocaíochtaí a leagtar amach in Airteagal 15 de na Reachtanna, déanfar iad a chuimsiú le ranníocaíochtaí eile faoi mar a leagtar amach i mír 1 agus i mír 2 den Airteagal seo.
- (4) Féadfaidh gach Stát Rannpháirteach na ranníocaíochtaí dá dtagraítear i bpointe (f) d'Airteagal 15(3) de na Reachtanna a sholáthar do thairbhíthe atá bunaithe sa Stát Rannpháirteach sin. Féadfaidh na Stáit Rannpháirteacha ranníocaíocht an Chomhghnóthais a chomhlánú, laistigh den uasráta aisíocaíochta is infheidhme a leagtar amach in Airteagal 30 de Rialachán (AE) Uimh. xxx lena mbunaítear Fís Eorpach, Airteagal xxx de Rialachán (AE) lena mbunaítear an Clár don Eoraip Dhigiteach agus in Airteagal xxx Rialachán (AE) Uimh. xxx maidir leis an tSaoráid um Chónascadh na hEorpa. Beidh na ranníocaíochtaí sin gan dochar do rialacha státchabhrach.
- (5) Tabharfaidh baill an Chomhghnóthais seachas an tAontas tuairisc faoin 31 Eanáir gach bliain don Bhord Rialála mar a shainmhínítear in Airteagal 15 de na Reachtanna, maidir le luach na ranníocaíochtaí dá dtagraítear i mír 1 agus i mír 2 den Airteagal seo a rinneadh sa bhliain airgeadais roimhe sin.
- (6) D'fhonn na ranníocaíochtaí dá dtagraítear i bpointí (b) go (f) d'Airteagal 15(3) de na Reachtanna a luacháil, cinnfear na costais i gcomhréir le gnáthchleachtais chuntasaíochta costais na n-eintiteas lena mbaineann, le caighdeáin chuntasaíochta infheidhme na tíre ina bhfuil an t-eintiteas bunaithe agus leis na Caighdeáin Chuntasaíochta Idirnáisiúnta is infheidhme agus na Caighdeáin Tuairiscithe Airgeadais Idirnáisiúnta. Is iniúchóir seachtrach neamhspleách a dheimhneoidh na costais, iniúchóir a cheapfaidh an t-eintiteas lena mbaineann. Féadfaidh an Comhghnóthas an modh luachála a dheimhniú, i gcás go mbeidh aon éiginnteacht ann de bharr an deimhniúcháin. Má tá éiginnteacht ann fós, féadfaidh an Comhghnóthas iniúchadh a dhéanamh ar an modh luachála.
- (7) Féadfaidh an Coimisiún ranníocaíocht airgeadais an Aontais leis an gComhghnóthas a fhoirceannadh, a laghdú go comhréireach nó a chur ar fionraí nó an nós imeachta foirceanta dá dtagraítear in Airteagal 24 de na Reachtanna a chur ar siúl sna cásanna seo a leanas:
 - (a) má mhainníonn an Comhghnóthas sna coinníollacha i gcomhlíonadh ranníocaíocht an Aontais, nó
 - (b) má mhainníonn na baill seachas an tAontas nó a gcomheintitis nó a n-eintitis chleamhnaithe sa ranníocaíocht, agus gan ach páirt den ranníocaíocht a dhéanamh, mura dtugann siad urraim do na tréimhsí ama maidir leis an ranníocaíocht dá dtagraítear i mír 1 agus i mír 2 den Airteagal seo, nó
 - (c) de thoradh na meastóireachtaí dá dtagraítear in Airteagal 22.

Cinneadh an Choimisiúin maidir le ranníocaíocht an Aontais a fhoirceannadh, a laghdú go comhréireach nó a chur ar fionraí, ní chuirfidh sé cosc ar aisíocaíocht na gcostas incháilithe a thabhaíonn na baill seachas an tAontas sula gcuirtear an cinneadh in iúl don Chomhghnóthas.

Airteagal 8

Eintiteas óstach

- (1) Beidh na sár-ríomhairí EuroHPC lonnaithe i Stát Rannpháirteach ar Ballstát é. Ní óstálfad Stát Rannpháirteach níos mó ná sár-ríomhaire EuroHPC amháin ach má

bhíonn níos mó ná dhá bhliain ann ó fuarthas an chéad cheann nó más ó theicneolaíochtaí difriúla a thagann siad (clasaiceach/candamach).

- (2) I gcás na sár-riomhairí EuroHPC dá dtagraítear in Airteagail 10, 11 agus 13 den Rialachán seo, féadfaidh an t-eintiteas óstach ionadaíocht a dhéanamh ar Stát Rannpháirteach ar Ballstát nó cuibhreannas óstach é. Déanfaidh an t-eintiteas óstach agus údaráis inniúla an Stáit Rannpháirtigh nó na Stát Rannpháirteach i gcuibhreannas óstach comhaontú chuige sin.
- (3) Déanfaidh an Comhghnóthas oibriú gach sár-riomhaire EuroHPC aonair atá faoi úinéireacht iomlán an Chomhghnóthais, nó atá faoina chomhúinéireacht i gcomhréir le hAirteagail 10, 11 agus 13 den Rialachán seo a chur ar iontaobh an eintitis óstach.
- (4) Roghnófar na heintitis óstaigh dá dtagraítear i mír 2 den Airteagal seo i gcomhréir le mír 5 den Airteagal seo agus rialacha airgeadais an Chomhghnóthais dá dtagraítear in Airteagal 17 den Rialachán seo.
- (5) Tar éis glao ar léiriú spéise, roghnóidh an Bord Rialála an t-eintiteas óstach dá dtagraítear i mír 2 den Airteagal seo agus an Stát Rannpháirteach comhfhreagrach ina bhfuil an t-eintiteas óstach bunaithe nó an cuibhreannas óstach comhfhreagrach trí phróiseas cothrom trédhearcach bunaithe, inter alia, ar na critéir seo a leanas:
 - (a) comhlíonadh shonraíochtaí ginearálta an chórais a shainítear sa ghlaó ar léiriú spéise;
 - (b) costas iomlán úinéireacht an tsár-riomhaire EuroHPC, lena n-áirítear meastachán cruinn agus modh fíorúcháin do chostais oibriúcháin an tsár-riomhaire sin i rith a shaolré;
 - (c) taithí an eintitis óstaigh ar chórais den chineál céanna a shuiteáil agus a oibriú;
 - (d) cáilíocht bhonneagar fisiceach agus TF na saoráide óstála, a shlándáil agus a nascacht leis an gcuid eile den Aontas;
 - (e) an cháilíocht seirbhíse do na húsáideoirí, eadhon cumas chun an comhaontú seirbhíse a chuirtear ar fáil i measc na ndoiciméad a bhíonn ag gabháil leis an nós imeachta roghnúcháin a chomhlíonadh;
 - (f) doiciméad tacaíochta iomchuí a sholáthar ina dtabharfar tiomantas an Bhallstáit ina bhfuil an t-eintiteas óstach bunaithe nó údaráis inniúla Stáit Rannpháirteacha an chuibhreannais óstaigh chun sciar de chostas iomlán úinéireachta an tsár-riomhaire EuroHPC a chumhdach, costas nach bhfuil cumhdaithe ag ranníocaíocht an Aontais mar a leagtar amach in Airteagal 5 ná aon ranníocaíocht eile de chuid an Aontais faoi mar a leagtar amach in Airteagal 6, go dtí go n-aistríonn an Comhghnóthas a úinéireacht chuig an eintiteas óstach sin nó go dtí go ndíoltar nó go ndíchoimisiúnaítear an sár-riomhaire mura ndéantar aon aistriú ar an úinéireacht.
- (6) I gcás na sár-riomhairí EuroHPC de ghrád tionsclaíoch dá dtagraítear in Airteagal 12 den Rialachán seo, rachaidh an t-eintiteas óstach i bpáirt leis na Baill Phríobháideacha nó le cuibhreannas comhpháirtithe príobháideacha chun sár-riomhairí den sórt sin nó codanna de shár-riomhairí EuroHPC a fháil agus a oibriú. Déanfaidh an t-eintiteas óstach comhaontú leis na Baill Phríobháideacha nó leis an gcuibhreannas de bhaill phríobháideacha chuige sin.

- (a) Déanfaidh an Comhghnóthas oibriú gach sár-ríomhaire EuroHPC aonair de ghrád tionsclaíoch atá faoi chomhúinéireacht i gcomhréir le hAirteagal 12 den Rialachán seo a chur ar iontaoibh an eintitis óstach.
- (b) Na heintitis óstaigh dá dtagraítear in Airteagal 17 den Rialachán seo, mar aon le rialacha airgeadais an Chomhghnóthais, is i gcomhréir le mír 5 den Airteagal seo a roghnófar iad.
- (c) Tar éis glao ar léiriú spéise, roghnóidh an Bord Rialála an t-eintiteas óstach agus a Bhaill Phríobháideacha chomhlachaithe nó an cuibhreannas comhpháirtithe príobháideacha trí phróiseas cothrom agus trédhearcach bunaithe, inter alia, ar na critéir a leagtar amach i míreanna 5(a) go dtí 5(e) den Airteagal seo agus ar an gceann breise a leanas:

Soláthrófar doiciméad tacaíochta iomchuí ina gcruthófar tiomantas na mBall Príobháideach nó an chuibhreannais comhpháirtithe príobháideacha chun sciar de chostas iomlán úinéireachta an tsár-ríomhaire EuroHPC a chumhdach, costas nach bhfuil cumhdaithe ag ranníocaíocht an Aontais mar a leagtar amach in Airteagal 5 ná ag aon ranníocaíocht eile de chuid an Aontais faoi mar a leagtar amach in Airteagal 6.

- (7) An t-eintiteas óstach a roghnófar, féadfaidh sé cinneadh a dhéanamh chun cuireadh a thabhairt, faoi réir chomhaontú roimh ré an Choimisiúin Eorpaigh, do Stáit Rannpháirteacha bhreise, nó do Bhaill Phríobháideacha nó do chuibhreannas comhpháirtithe príobháideacha, cuireadh le dul isteach sa chuibhreannas óstach. An ranníocaíocht airgeadais agus an ranníocaíocht chomhchineáil ná aon tiomantas eile a thabharfaidh na Stáit Rannpháirteacha nua, nó na Baill Phríobháideacha, ní dhéanfaidh ceachtar díobh difear do ranníocaíocht airgeadais an Aontais agus na cearta úinéireachta comhfhreagracha agus an céatadán ama rochtana a leithdháilfear ar an Aontas maidir leis an sár-ríomhaire EuroHPC sin mar a shainmhínítear in Airteagail 10, 11, 12, agus 13.

Airteagal 9

Comhaontú óstach

- (1) Sula seoltar an nós imeachta chun sár-ríomhaire EuroHPC a fháil, cuirfidh an Comhghnóthas comhaontú óstach i gcrích le gach eintiteas óstach a roghnófar.
- (2) Tabharfar aghaidh go háirithe sa chomhaontú óstach ar na gnéithe seo a leanas maidir leis na sár-ríomhairí EuroHPC:
 - (a) na cearta agus na hoibleagáidí i rith an nós imeachta chun an sár-ríomhaire a fháil, lena n-áirítear tástálacha inghlacthachta an tsár-ríomhaire;
 - (b) na coinníollacha dliteanais chun an sár-ríomhaire a oibriú;
 - (c) an cháilíocht seirbhíse a thairgfear do na húsáideoirí ar oibriú an tsár-ríomhaire, faoi mar a leagtar amach sa chomhaontú seirbhíse;
 - (d) na pleananna maidir le héifeachtúlacht fuinnimh agus inbhuanaitheacht chomhshaoil an tsár-ríomhaire;
 - (e) coinníollacha rochtana do sciar an Aontais d'am rochtana ar an sár-ríomhaire, de réir mar a chinneann an Bord Rialála i gcomhréir le hAirteagal 15;
 - (f) modhanna cuntaisíochta na n-amanna rochtana;

- (g) sciar den chostas iomlán úinéireachta a shocróidh an t-eintiteas óstach a bheidh cumhdaithe ag an Stát Rannpháirteach sa chás go bhfuil an t-eintiteas óstach bunaithe sa chuibhreannas óstach nó ag na Stáit Rannpháirtithe sa chuibhreannas óstach;
 - (h) na coinníollacha maidir leis an aistriú úinéireachta dá dtagraítear in Airteagail 10(4), 11(5), 12(5) agus 13(4), lena n-áirítear, i gcás na sár-ríomhairí EuroHPC, forálacha maidir lena luach iarmharach agus maidir lena ndíchoimisiúnú a ríomh;
 - (i) an oibleagáid atá ar an eintiteas óstach chun rochtain a sholáthar ar na sár-ríomhairí EuroHPC, ag áirithiú ag an am céanna shlándáil na sár-ríomhairí, cosaint sonraí pearsanta i gcomhréir le Rialachán (AE) 2016/679, cosaint príobháideachas cumarsáide leictreonaí i gcomhréir le Treoir 2002/58/CE, cosaint rúin trádála i gcomhréir le Treoir (AE) 2016/943 agus cosaint rúndacht sonraí eile atá cumhdaithe ag an oibleagáid maidir le rúndacht ghairmiúil;
 - (j) an oibleagáid atá ar an eintiteas óstach nós imeachta iniúchta deimhnithe a chur i bhfeidhm ag cumhdach costais oibriúcháin an tsár-ríomhaire EuroHPC agus amanna rochtana na n-úsáideoirí;
 - (k) an oibleagáid atá ar an eintiteas óstach tuarascáil iniúchóireachta agus sonraí maidir leis an úsáid a baineadh as am rochtana sa bhliain airgeadais roimhe sin a chur isteach chuig an mBord Rialála faoin 31 Eanáir gach bliain;
 - (l) na coinníollacha sonracha is infheidhme nuair a oibríonn an t-eintiteas óstach sár-ríomhaire EuroHPC le húsáid sa tionsclaíocht.
- (3) Is ag dlí an Aontais a bheidh an comhaontú óstach á rialú, agus forlíonadh déanta air in aon ní nach bhfuil cumhdaithe ag an Rialachán seo nó ag aon ghníomhartha dlíthiúla eile de chuid an Aontais trí dhlí an Bhallstáit ina bhfuil an t-eintiteas óstach lonnaithe.
- (4) Beidh clásal eadrána sa chomhaontú óstach, de réir bhrí Airteagal 272 de CFAE, ag deonú dlínse ar gach ní a chumhdáitear sa chomhaontú chuig Cúirt Bhreithiúnais an Aontais Eorpaigh.
- (5) Tar éis an comhaontú óstach a chur i gcrích, agus gan dochar do mhír 2 den Airteagal seo, seolfaidh an Comhghnóthas, le tacaíocht ón eintiteas óstach a roghnófar, na nósanna imeachta maidir leis an sár-ríomhaire EuroHPC a fháil i gcomhréir le rialacha airgeadais an Chomhghnóthais dá dtagraítear in Airteagal 17.
- (6) I gcás ríomhairí meán-raoin, tar éis an comhaontú óstach a chur i gcrích, seolfaidh an Comhghnóthas, nó an tEintiteas Óstach thar ceann an dá pháirtí chonarthacha na nósanna imeachta maidir leis an sár-ríomhaire EuroHPC a fháil i gcomhréir le rialacha airgeadais an Chomhghnóthais dá dtagraítear in Airteagal 17.

Airteagal 10

Fáil agus úinéireacht na sár-ríomhairí ardleibhéil

- (1) Gheobhaidh an Comhghnóthas na sár-ríomhairí ardleibhéil agus is é a bheidh ina úinéir orthu.
- (2) Ranníocaíocht airgeadais an Aontais dá dtagraítear in Airteagal 5(1), cumhdóidh sé suas le 50 % de na costais éadála móide suas le 50 % de chostais oibriúcháin na sár-ríomhairí ardleibhéil.

Costas iomlán úinéireachta na sár-ríomhairí ardleibhéil a bheidh fágtha, beidh an costas sin cumhdaithe ag an Stát Rannpháirteach ina bhfuil an t-eintiteas óstach lonnaithe nó ag na Stáit Rannpháirteacha sa chuibhreannas óstach, agus féadfar é a fhorlíonadh leis na ranníocaíochtaí dá dtagraítear in Airteagal 6.

- (3) Tabharfar aghaidh ar shlándáil an tslabhra soláthair tráth a roghnófar soláthróir an tsár-ríomhaire ardleibhéil.
- (4) Gan dochar d'fhoirceannadh an Chomhghnóthais, dá dtagraítear in Airteagal 24(4) de na Reachtanna, cúig bliana ar a thúisce tar éis tástáil inghlacthachta rathúil an Chomhghnóthais ar na sár-ríomhairí ardleibhéil arna suiteáil in eintiteas óstach, féadfar úinéireacht an tsár-ríomhaire ardleibhéil a aistriú chuig an eintiteas óstach faoi seach, é a dhíol le heintiteas eile nó a dhíchoimisiúnú ar chinneadh an Bhoird Rialála agus i gcomhréir leis an gcomhaontú óstach. I gcás aistriú na húinéireacht ar sár-ríomhaire ardleibhéil, aisíocfaidh an t-eintiteas óstach luach iarmharach an tsár-ríomhaire a aistrítear leis an gComhghnóthas. Mura ndéantar aon aistriú úinéireachta chuig an eintiteas óstach ach go gcinntear é a dhíchoimisiúnú, roinnfear na costais ábhartha go cothrom idir an Comhghnóthas agus an t-eintiteas óstach. Ní bheidh dliteanas ar an gComhghnóthas maidir le haon chostais a thabhfófar tar éis úinéireacht an tsár-ríomhaire ardleibhéil a aistriú nó tar éis a dhíolta nó a dhíchoimisiúnaithe.

Airteagal 11

Fáil agus úinéireacht na ríomhairí candamacha agus na n-ionsamhlóirí candamacha

- (1) Gheobhaidh an Comhghnóthas ríomhairí candamacha agus ionsamhlóirí candamacha, a bhféadfadh idir chórais phiolótacha agus chórais thurgnamhacha a bheith i gceist leo nó fréamhshamlacha agus córais oibriúcháin mar innill aonair nó cinn a bhfuil hibridiú déanta orthu nó innill Ríomhaireachta Ardtheidhmíochta meán-raoin atá inrochtana tríd an néal, agus is é a bheidh ina úinéir orthu.
- (2) Cumhdóidh ranníocaíocht airgeadais an Aontais dá dtagraítear in Airteagal 5(1) suas le 50 % de na costais éadála móide suas le 50 % de chostais oibriúcháin na ríomhairí candamacha agus na n-ionsamhlóirí candamacha.

Costas iomlán úinéireachta na ríomhairí candamacha agus na n-ionsamhlóirí candamacha a bheidh fágtha, is costas é a bheidh cumhdaithe ag an Stát Rannpháirteach ina bhfuil an t-eintiteas óstach lonnaithe nó ag na Stáit Rannpháirteacha sa chuibhreannas óstach, costas a fhéadfar a fhorlíonadh leis na ranníocaíochtaí dá dtagraítear in Airteagal 6.

- (3) Tabharfar aghaidh ar shlándáil an tslabhra soláthair tráth a roghnófar soláthróir na ríomhairí candamacha agus na n-ionsamhlóirí candamacha.
- (4) Is in eintiteas óstach sár-ríomhaire EuroHPC a bheidh na ríomhairí candamacha agus na hionsamhlóirí candamacha lonnaithe, sin nó i lárionad sár-ríomhaireachta Shraith-0 a bheidh lonnaithe san Aontas.
- (5) Gan dochar d'fhoirceannadh an Chomhghnóthais dá dtagraítear in Airteagal 24(4) de na Reachtanna, ceithre bliana ar a thúisce tar éis tástáil inghlacthachta rathúil an ríomhaire chandamaigh nó an ionsamhlóra chandamaigh arna suiteáil in eintiteas óstach, féadfar úinéireacht an ríomhaire chandamaigh nó an ionsamhlóra chandamaigh a aistriú chuig an eintiteas óstach sin, é a dhíol le heintiteas eile nó a dhíchoimisiúnú ar chinneadh an Bhoird Rialála agus i gcomhréir leis an gcomhaontú

óstach. I gcás úinéireacht ríomhaire chandamaigh nó ionsamhlóra chandamaigh a aistriú, aisíocfaidh an t-eintiteas óstach luach iarmharach an tsár-ríomhaire a aistrítear leis an gComhghnóthas. Mura ndéantar aon aistriú úinéireachta chuig an eintiteas óstach ach má chinntear é a dhíchoimisiúnú, roinnfear na costais ábhartha go cothrom idir an Comhghnóthas agus an t-eintiteas óstach. Ní bheidh dliteanas ar an gComhghnóthas maidir le haon chostais a thabhófar tar éis úinéireacht an ríomhaire chandamaigh nó an ionsamhlóra chandamaigh a aistriú nó tar éis a dhíolta nó a dhíchoimisiúnaithe.

Airteagal 12

Fáil agus úinéireacht sár-ríomhairí EuroHPC de ghrád tionsclaíoch

- (1) Gheobhaidh an Comhghnóthas in éineacht leis na Baill Phríobháideacha, nó cuibhreannas comhpháirtithe príobháideacha, sár-ríomhairí, nó codanna de shár-ríomhairí EuroHPC, atá ceaptha go príomha le húsáid sa tionscal, agus beidh sé ina úinéir nó ina chomhúinéir orthu leis na Baill Phríobháideacha nó le cuibhreannas comhpháirtithe príobháideacha.
- (2) Cumhdóidh ranníocaíocht airgeadais an Aontais dá dtagraítear in Airteagal 5(1) suas le 35 % de chostais éadála na sár-ríomhairí EuroHPC, nó na codanna de shár-ríomhairí EuroHPC. Cumhdóidh na Baill Phríobháideacha, nó cuibhreannas comhpháirtithe príobháideacha an costas iomlán úinéireachta a bheidh fágtha de na sár-ríomhairí EuroHPC, nó codanna de na sár-ríomhairí EuroHPC.
- (3) Tabharfar aghaidh ar shlándáil an tslabhra soláthair tráth a roghnófar soláthróir an tsár-ríomhaire EuroHPC de ghrád tionsclaíoch.
- (4) Sár-ríomhairí EuroHPC nó codanna den sár-ríomhaire EuroHPC i gcomhair úsáid thionsclaíoch, is in eintiteas óstach sár-ríomhaire EuroHPC a bheidh siad á n-óstáil.
- (5) Gan dochar d'fhoirceannadh an Chomhghnóthais, dá dtagraítear in Airteagal 24(4) de na Reachtanna, ceithre bliana ar a thúisce tar éis tástáil inghlacthachta rathúil an Chomhghnóthais ar na sár-ríomhairí EuroHPC arna suiteáil in eintiteas óstach, féadfar úinéireacht an tsár-ríomhaire EuroHPC a aistriú chuig na Baill Phríobháideacha nó chuig an gcuibhreannas comhpháirtithe príobháideacha, é a dhíol le heintiteas eile nó a dhíchoimisiúnú ar chinneadh an Bhoird Rialála agus i gcomhréir leis na Baill Phríobháideacha nó leis an gcuibhreannas comhpháirtithe príobháideacha. I gcás úinéireacht sár-ríomhaire EuroHPC a aistriú, aisíocfaidh na Baill Phríobháideacha nó an cuibhreannas comhpháirtithe príobháideacha luach iarmharach an tsár-ríomhaire EuroHPC a aistrítear leis an gComhghnóthas. Mura ndéantar aon aistriú úinéireachta chuig na Baill Phríobháideacha nó chuig an gcuibhreannas comhpháirtithe príobháideacha ach go gcinntear é a dhíchoimisiúnú, roinnfear na costais ábhartha go cothrom idir na Baill Phríobháideacha nó an cuibhreannas comhpháirtithe príobháideacha. Ní bheidh dliteanas ar an gComhghnóthas maidir le haon chostais a thabhófar tar éis úinéireacht an tsár-ríomhaire EuroHPC a aistriú nó tar éis é a dhíol nó a dhíchoimisiúnú.

Airteagal 13

Fáil agus úinéireacht na sár-ríomhairí meán-raoin

- (1) Gheobhaidh an Comhghnóthas, go comhpháirteach le húdaráis chonarthaigh an Stáit Rannpháirtigh ina bhfuil an t-eintiteas óstach lonnaithe nó le húdaráis chonarthaigh

na Stát Rannpháirteach sa chuibhreannas óstach, na sár-ríomhairí meán-raoin agus beidh sé ina úinéir orthu.

- (2) Cumhdóidh ranníocaíocht airgeadais an Aontais dá dtagraítear in Airteagal 5(1) suas le 35 % de chostais éadála na sár-ríomhairí meán-raoin. Beidh costas iomlán úinéireachta na sár-ríomhairí meán-raoin a bheidh fágtha cumhdaithe ag an Stát Rannpháirteach ina bhfuil an t-eintiteas óstach lonnaithe nó ag na Stáit Rannpháirteacha sa chuibhreannas óstach, agus féadfar é a fhorlíonadh leis na ranníocaíochtaí dá dtagraítear in Airteagal 6.
- (3) Tabharfar aghaidh air le slándáil an tslabhra soláthair tráth a roghnófar soláthróir an tsár-ríomhaire meán-raoin.
- (4) Gan dochar d'fhoirceannadh an Chomhghnóthais, dá dtagraítear in Airteagal 24(4) de na Reachtanna, déanfar an chuid d'úinéireacht an tsár-ríomhaire atá faoi úinéireacht an Chomhghnóthais a aistriú chuig an eintiteas óstach tar éis dímheas iomlán a bheith déanta ar an sár-ríomhaire. Aisíocfaidh an t-eintiteas óstach luach iarmharach an tsár-ríomhaire a aistrítear leis an gComhghnóthas. Ní bheidh dliteanas ar an gComhghnóthas maidir le haon chostais a thabhófar tar éis úinéireacht an tsár-ríomhaire meán-raoin a aistriú.

Airteagal 14

Sár-ríomhairí EuroHPC a úsáid

- (1) Feadfaidh úsáideoirí as na hearnálacha poiblí agus príobháideacha úsáid a bhaint as sár-ríomhairí EuroHPC agus díreofar go príomha ar fheidhmchláir shaoránach. Seachas na sár-ríomhairí EuroHPC de ghrád tionsclaíoch, úsáidfear iad go príomha chun críche taighde agus nuálaíochta a thagann faoi chláir chistiúcháin phoiblí, le haghaidh fheidhmchláir na hearnála poiblí agus le haghaidh gníomhaíochtaí nuálacha príobháideacha FBManna, i gcás inarb iomchuí.
- (2) Saineoidh an Bord Rialála na coinníollacha ginearálta rochtana maidir le sár-ríomhairí EuroHPC a úsáid i gcomhréir le hAirteagal 15 agus féadfaidh sé na coinníollacha sonracha rochtana a shainiú le haghaidh cineálacha difriúla úsáideoirí nó feidhmeanna. Beidh slándáil agus cáilíocht na seirbhíse mar an gcéanna do gach úsáideoir laistigh de gach catagóir úsáideora, ach amháin i gcás na sár-ríomhairí EuroHPC de ghrád tionsclaíoch, a gcomhlíonfaidh a gcuid slándála agus a gcáilíocht seirbhíse ceanglais tionsclaíochta, i gcomhréir le hAirteagal 12(1) den Rialachán seo.
- (3) Maidir le húsáideoirí atá ina gcónaí, bunaithe nó lonnaithe i mBallstát nó i dtír atá comhlachaithe le Fís 2020, deonófar rochtain dóibh ar sciar an Aontais d'am rochtana ar na sár-ríomhairí a fuair an Comhghnóthas a bunaíodh le Rialachán 2018/1488 ón gComhairle.
- (4) Maidir le húsáideoirí atá ina gcónaí, bunaithe nó lonnaithe i mBallstát nó i dtír atá comhlachaithe leis an gClár don Eoraip Dhigiteach nó le Fís Eorpach, deonófar am rochtana dóibh ar shár-ríomhairí EuroHPC arna bhfaíl tar éis 2020.
- (5) I gcásanna a bhfuil údar cuí leo, ag cur leasanna an Aontais san áireamh, cinnfidh an Bord Rialála am rochtana ar shár-ríomhairí EuroHPC a dheonú d'eintitis atá ina gcónaí, bunaithe nó lonnaithe in aon tríú tír agus eagraíochtaí idirnáisiúnta.

Airteagal 15

Am rochtana an Aontais a leithdháileadh ar na sár-ríomhairí EuroHPC

- (1) An sciar d'am rochtana an Aontais ar gach sár-ríomhaire EuroHPC, is rud é a bheidh i gcomhréir dhíreach le ranníocaíocht airgeadais an Aontais dá dtagraítear in Airteagal 5(1) de chostas iomlán úinéireachta an tsár-ríomhaire EuroHPC, agus ní bheidh sé níos mó ná 50 % d'am rochtana iomlán an tsár-ríomhaire EuroHPC.
- (2) An sciar d'am rochtana an Aontais ar gach sár-ríomhaire meán-raoin, is rud é a bheidh i gcomhréir dhíreach le ranníocaíocht airgeadais an Aontais dá dtagraítear in Airteagal 5(1) de chostas éadála an tsár-ríomhaire agus ní bheidh sé níos mó ná 35 % d'am rochtana iomlán an tsár-ríomhaire.
- (3) An sciar d'am rochtana an Aontais ar gach sár-ríomhaire EuroHPC de ghrád tionsclaíoch, is rud é a bheidh i gcomhréir dhíreach le ranníocaíocht airgeadais an Aontais dá dtagraítear in Airteagal 5(1) de chostas éadála an tsár-ríomhaire, agus ní bheidh sé níos mó ná 35 % d'am rochtana iomlán an tsár-ríomhaire.
- (4) Déanfar sciar den am rochtana a bheidh fágtha ar gach sár-ríomhaire EuroHPC a leithdháileadh ar gach Stát Rannpháirteach ina bhfuil eintiteas óstach bunaithe nó ar gach Stát Rannpháirteach i gcuibhreannas óstach. I gcás cuibhreannas óstach, comhaontóidh na Stáit Rannpháirteacha eatarthu féin an dáileadh ama rochtana don sár-ríomhaire.
- (5) Saineoidh an Bord Rialála na cearta rochtana ar sciar an Aontais d'am rochtana ar na sár-ríomhairí EuroHPC.
- (6) Beidh an úsáid a bhainfear as sciar an Aontais d'am rochtana ar na sár-ríomhairí EuroHPC saor in aisce do na húsáideoirí ón earnáil phoiblí dá dtagraítear in Airteagal 14(4) den Rialachán seo. Beidh sé saor in aisce freisin d'úsáideoirí tionsclaíochta i gcás feidhmchláir a bhaineann le gníomhaíochtaí taighde agus nuálaíochta arna gcistiú ag Fís Eorpach nó ag an gClár don Eoraip Dhigiteach agus le haghaidh gníomhaíochtaí nuálacha FBManna, i gcás inarb iomchuí. Mar threoirphrionsabal, beidh leithdháileadh ama rochtana do na gníomhaíochtaí sin bunaithe ar phróiseas athbhreithnithe píaraí a bheidh cothrom agus trédhearcach arna shainiú ag an mBord Rialála tar éis glaonna leanúnacha oscailte ar léiriú spéise arna seoladh ag an gComhghnóthas.
- (7) Cé is moite d'úsáideoirí FBM a bhíonn ag gabháil do ghníomhaíochtaí nuálacha, glacfadh úsáideoirí eile le cur chuige oscailte eolaíochta maidir le scaipeadh eolais a fhaightear trí rochtain ar shár-ríomhairí an Chomhghnóthais, i gcomhréir le hAirteagal xxx den Rialachán maidir le Fís Eorpach. Tabharfaidh an Bord Rialála sainiú breise ar na rialacha eolaíochta oscailte is infheidhmithe.
- (8) Saineoidh an Bord Rialála na rialacha sonracha le haghaidh coinníollacha rochtana a imíonn ó na treoirphrionsabail dá dtagraítear i mír 6 den Airteagal seo. Baineann siad sin le sannadh ama rochtana do thionscadail agus gníomhaíochtaí a mheasann an tAontas nó an Bord Rialála gur tionscadail agus gníomhaíochtaí straitéiseacha iad.
- (9) Ar iarraidh ón Aontas, deonóidh an Stiúrthóir Feidhmiúcháin rochtain dhíreach ar na sár-ríomhairí EuroHPC do thionscnaimh is dóigh leis an Aontas a bheith riachtanach chun seirbhísí tacaíochta a bhaineann le sláinte nó seirbhísí tacaíochtaí éigeandála criticiúla eile a sholáthar ar mhaithe le leas an phobail, ar chásanna éigeandála agus bainistithe géarchéime nó ar chásanna is dóigh leis an Aontas a bheith riachtanach dá shlándáil agus dá chosaint. Saineofar na modhanna agus na coinníollacha maidir le rochtain den sórt sin a chur chun feidhme sna coinníollacha rochtana arna nglacadh ag an mBord Rialála.

- (10) Saineoidh an Bord Rialála na coinníollacha a mbeidh feidhm leo d'úsáid thionsclaíoch chun rochtain a sholáthar ar acmhainní slána Ríomhaireachta Ardfheidhmíochta agus sonraí d'fheidhmchláir seachas iad sin a shonraítear i mír 6 den Airteagal seo.
- (11) Déanfaidh an Bord Rialála faireachán rialta ar am rochtana an Aontais a dheonófar in aghaidh an Stáit Rannpháirtigh agus in aghaidh gach catagóire úsáideora, lena n-áirítear chun tráchtála. Féadfaidh sé cinneadh a dhéanamh chun:
- (a) amanna rochtana a chur in oiriúint in athuair de réir na catagóire gníomhaíochta nó úsáideora, agus é mar aidhm cumais úsáide na sár-ríomhairí EuroHPC a fheabhsú;
 - (b) bearta breise tacaíochta a mholadh d'fhonn deiseanna cothroma rochtana a sholáthar d'úsáideoirí a mbeadh sé d'aidhm acu a leibhéal scileanna agus saineolais i gcórais Ríomhaireachta Ardfheidhmíochta a ardú.

Airteagal 16

Am rochtana an Aontais ar shár-ríomhairí EuroHPC chun tráchtála

- (1) Beidh feidhm ag coinníollacha sonracha maidir le gach úsáideoir thionsclaíoch chun críocha tráchtála. Is seirbhís íoc in aghaidh na húsáide a bheidh sa tseirbhís seo ar úsáid tráchtála, í bunaithe ar phraghsanna an mhargaidh. Is é an Bord Rialála a leagfaidh síos leibhéal na táille.
- (2) Cuimseofar sna táillí a ghinfear de bharr úsáid tráchtála am rochtana an Aontais ioncam do bhuiséad an Chomhghnóthais, agus úsáidfear é chun costais oibriúcháin an Chomhghnóthais a chumhdach.
- (3) Ní bheidh an t-am rochtana a leithdháilfear ar sheirbhísí tráchtála níos mó ná 20 % d'am rochtana iomlán an Aontais ar gach sár-ríomhaire EuroHPC. Déanfaidh an Bord Rialála cinneadh maidir le leithdháileadh ama rochtana an Aontais d'úsáideoirí seirbhísí tráchtála, agus cuirfear toradh an fhaireacháin dá dtagraítear in Airteagal 15(10) san áireamh.
- (4) Beidh cáilíocht na seirbhísí tráchtála mar an gcéanna i gcás na n-úsáideoirí uile.

Airteagal 17

Rialacha airgeadais

- (1) Glacfaidh an Comhghnóthas a rialacha airgeadais sonracha i gcomhréir le hAirteagal 71 de Rialachán (AE, Euratom) 2018/1046.
- (2) Foilseofar na rialacha airgeadais ar shuíomh gréasáin an Chomhghnóthais.

Airteagal 18

Foireann

- (1) Maidir le Rialacháin Foirne Oifigigh an Aontais Eorpaigh agus Coinníollacha Fostaíochta Sheirbhísigh eile an Aontais Eorpaigh a leagtar síos i Rialachán (CEE, Euratom, CEEG) Uimh. 259/68 ón gComhairle⁸ ('Rialacháin Foirne' agus

⁸ Rialachán (CEE, Euratom, CEEG) Uimh. 259/68 ón gComhairle an 29 Feabhra 1968 lena leagtar síos Rialacháin Foirne Oifigigh na gComhphobal Eorpach agus Coinníollacha Fostaíochta Sheirbhísigh eile

‘Coinníollacha Fostaíochta’) agus sna rialacha a ghlac institiúidí an Aontais go comhpháirteach chun na Rialacháin Foirne agus na Coinníollacha Fostaíochta sin a chur i bhfeidhm, ba cheart go mbeadh feidhm acu maidir le foireann an Chomhghnóthais.

- (2) Déanfaidh an Bord Rialála, maidir le foireann an Chomhghnóthais, na cumhachtaí a fheidhmiú a thugtar don Údarás Ceapacháin leis na Rialacháin Foirne agus leis na Coinníollacha Fostaíochta don Údarás atá cumhachtaithe chun conarthaí fostaíochta a thabhairt chun críche (‘cumhachtaí an údaráis cheapacháin’).
- (3) Glacfaidh an Bord Rialála, i gcomhréir le hAirteagal 110 de na Rialacháin Foirne, cinneadh bunaithe ar Airteagal 2(1) de na Rialacháin Foirne agus ar Airteagal 6 de na Coinníollacha Fostaíochta, lena dtarmilgfeair cumhachtaí ábhartha an údaráis ceapacháin chuig an Stiúrthóir Feidhmiúcháin agus lena saineofar na coinníollacha faoinar féidir an tarmligeán sin a chur ar fionraí. Beidh an Stiúrthóir Feidhmiúcháin údraithe na cumhachtaí sin a fho-tharmiligeán.
- (4) I gcás inar gá é mar gheall ar imthosca eisceachtúla, féadfaidh an Bord Rialála cinneadh a dhéanamh tarmligeán chumhachtaí an údaráis ceapacháin chuig an Stiúrthóir Feidhmiúcháin a chur ar fionraí go sealadach agus aon fho-tharmligeán ina dhiaidh sin a dhéanfaidh an Stiúrthóir Feidhmiúcháin ar na cumhachtaí sin. Sna cásanna sin, feidhmeoidh an Bord Rialála cumhachtaí an údaráis ceapacháin é féin nó tarmligfidh sé iad chuig duine dá chomhaltaí nó chuig ball foirne de chuid an Chomhghnóthais seachas an Stiúrthóir Feidhmiúcháin.
- (5) Glacfaidh an Bord Rialála rialacha iomchuí cur chun feidhme le héifeacht a thabhairt do na Rialacháin Foirne agus do na Coinníollacha Fostaíochta i gcomhréir le hAirteagal 110 de na Rialacháin Foirne.
- (6) Leagfar na hacmhainní foirne amach i bpleán bunaithe foirne an Chomhghnóthais, pleán ina dtugtar le fios líon na bpost sealadach de réir an ghrúpa feidhme agus de réir gráid, chomh maith le líon na foirne ar conradh arna gcur in iúl i gcoibhéisí lánaimseartha, i gcomhréir lena bhuiséad bliantúil.
- (7) Beidh foireann shealadach agus foireann ar conradh ag obair don Chomhghnóthas.
- (8) Is é an Comhghnóthas a íocfaidh na costais go léir a bhaineann leis an bhfoireann.

Airteagal 19

Saineolaithe náisiúnta ar iasacht agus oiliúnaithe

- (1) Féadfaidh an Comhghnóthas úsáid a bhaint as sainiolaithe náisiúnta ar iasacht agus oiliúnaithe nach bhfuil fostaithe ag an gComhghnóthas. Cuirfear líon na sainiolaithe náisiúnta ar iasacht arna chur in iúl ina choibhéisí lánaimseartha leis an bhfaisnéis maidir le hacmhainní foirne dá dtagraítear in Airteagal 18(4) i gcomhréir leis an mbuiséad bliantúil.
- (2) Glacfaidh an Bord Rialála le cinneadh ina leagfar síos rialacha maidir le sainiolaithe náisiúnta a thabhairt ar iasacht don Chomhghnóthas agus maidir le húsáid a bhaint as oiliúnaithe.

na gComhphobal Eorpach agus lena dtionscnaítear bearta speisialta is infheidhme ar bhonn sealadach maidir le hoifigigh an Choimisiúin (IO L 56, 4.3.1968, lch. 1).

Airteagal 20

Pribhléidí agus Díolúintí

Beidh feidhm ag Prótacal Uimh. 7 maidir le pribhléidí agus díolúintí an Aontais Eorpaigh, atá i gceangal leis an gConradh ar an Aontas Eorpach agus leis an gConradh ar Fheidhmiú an Aontais Eorpaigh, maidir leis an gComhghnóthas agus foireann an Chomhghnóthais.

Airteagal 21

Dliteanas an Chomhghnóthais

- (1) Rialófar dliteanas conarthach an Chomhghnóthais trí na forálacha conarthachta ábhartha agus tríd an dlí is infheidhme maidir leis an gcomhaontú, maidir leis an gcinneadh nó maidir leis an gconradh i dtrácht.
- (2) I gcás dliteanais neamhchonarthaigh, déanfaidh an Comhghnóthas, i gcomhréir leis na prionsabail ghinearálta is coiteann do dhlíthe na mBallstát, aon damáiste arb é a fhoireann féin is cúis leis i bhfeidhmiú a gcuid feidhmeanna a shlánú.
- (3) Measfar gur caiteachas de chuid an Chomhghnóthais aon íocaíocht a dhéanfaidh an Comhghnóthas maidir leis an dliteanas dá dtagraítear i mír 1 agus i mír 2, agus maidir leis na costais agus na speansais a tabhaíodh i dtaca leis sin, agus cumhdófar iad ina chuid acmhainní féin.
- (4) Ní bheidh freagrach as comhlíonadh a chuid oibleagáidí féin ach an Comhghnóthas amháin.
- (5) Ní bheidh an Comhghnóthas faoi dhliteanas i leith aon damáiste a dhéanfar de bharr ghníomhaíochtaí an eintitis óstaigh maidir le hoibriú na sár-ríomhairí a bhí faoina úinéireacht ag an eintiteas óstach.

Airteagal 22

Faireachán agus meastóireacht

- (1) Beidh gníomhaíochtaí an Chomhghnóthais faoi réir faireachán leanúnach agus athbhreithnithe tréimhsiúla i gcomhréir lena chuid rialacha airgeadais, d'fhonn an tionchar agus an feabhas is mó a áirithiú, chomh maith leis an úsáid is éifeachtúla acmhainní. Cuirfear torthaí an fhaireacháin agus na n-athbhreithnithe tréimhsiúla leis na meastóireachtaí ar an gComhghnóthas mar chuid de na meastóireachtaí in Fís Eorpach.
- (2) Eagróidh an Comhghnóthas faireachán leanúnach ar a ghníomhaíochtaí bainistíochta agus ar athbhreithnithe tréimhsiúla ar aschuir, torthaí agus tionchair na dtionscadal a chuirfear chun feidhme ag teacht le hAirteagal 45 agus Iarscríbhinn III de Rialachán (AE) Uimh. xxx lena mbunaítear Fís Eorpach.
- (3) Cuirfear meastóireachtaí ar oibríochtaí na gComhghnóthas i gcrích go caoithiúil chun fónamh do na meastóireachtaí eatramhacha agus deiridh foriomlána in Fís Eorpach agus don phróiseas cinnteoireachta gaolmhar mar a shonraítear in Airteagal 47 de Rialachán (AE) Uimh. xxx lena mbunaítear Fís Eorpach.
- (4) Déanfaidh an Coimisiún meastóireacht eatramhach ar gach Comhghnóthas mar chuid de mheastóireacht eatramhach Fís Eorpach, mar a shonraítear in Airteagal 47 de Rialachán (AE) Uimh. xxx lena mbunaítear Fís Eorpach. Cuirfear an mheastóireacht sin i gcrích le cúnamh ó shaineolaithe neamhspleácha de phróiseas trédhearcach a

thúisce a bheidh ár ndóthain faisnéise againn faoi chur chun feidhme Fís Eorpach, ach tráth nach déanaí ná ceithre bliana tar éis tús a chur le cur chun feidhme Fís Eorpach. Déanfar imscrúdú sna meastóireachtaí ar conas a chomhlíonann an Comhghnóthas a mhisean de réir a chuspóirí eacnamaíocha, teicneolaíochta, eolaíochta, sochaíocha agus beartais, lena n-áirítear cuspóirí a bhaineann leis an aeráid, agus déanfar meastóireacht ar éifeachtacht, éifeachtúlacht, ábharthacht, comhleanúnachas, agus breisluach an Aontais dá chuid gníomhaíochtaí mar chuid de Fís Eorpach, a chuid sineirgí agus comhlántachtaí le tionscnaimh ábhartha Eorpacha, náisiúnta agus, i gcás inarb ábhartha, réigiúnacha, lena n-áirítear sineirgí le codanna eile de Fís Eorpach (amhail misin, braislí nó cláir théamacha/shonracha). Beidh aird ar leith ar an tionchar a baineadh amach ar leibhéal an Aontais agus go náisiúnta, agus comhpháirt na sineirgí agus athúsáide beartais á gcur san áireamh. Áireofar leis na meastóireachtaí freisin, i gcás inarb ábhartha, measúnú ar thionchar fadtéarmach an Chomhghnóthais ó thaobh na heolaíochta, na sochaí, an gheilleagair atá ábhartha do bheartas agus áireofar leis measúnú ar an modh idirghabhála beartais is éifeachtaí le haghaidh aon ghnímh sa todhchaí, chomh maith le haon athnuachan a fhéadfar a dhéanamh ar an gComhghnóthas a shuíomh i dtírdhreach foriomlán na gComhpháirtíochtaí Eorpacha agus a chuid tosaíochtaí beartais.

- (5) Ar bhonn chonclúidí na meastóireachta eatramhaí dá dtagraítear i mír 1 den Airteagal seo, féadfaidh an Coimisiún gníomhú i gcomhréir le hAirteagal 7(7) nó féadfaidh sé aon ghníomh iomchuí eile a dhéanamh.
- (6) Féadfaidh an Coimisiún meastóireachtaí breise a dhéanamh ar théamaí nó ar topaicí atá ábhartha go straitéiseach, le cúnamh ó shaineolaithe neamhspleácha ar de phróiseas trédhearcach, chun scrúdú a dhéanamh ar an dul chun cinn a rinne an Comhghnóthas i dtreo na gcuspóirí a leagadh síos, agus na tosca a rannchuidíonn le cur chun feidhme na ngníomhaíochtaí a shainaithint agus dea-chleachtais a shainaithint freisin. Ach na meastóireachtaí breise sin a dhéanamh, déanfaidh an Coimisiún a mhachnamh iomlán ar thionchar riaracháin an Chomhghnóthais.
- (7) Déanfaidh an Comhghnóthas athbhreithnithe tréimhsiúla ar a chuid gníomhaíochtaí chun treoir a thabhairt do na meastóireachtaí eatramhacha agus deiridh ar an gComhghnóthas mar chuid de na meastóireachtaí in Fís Eorpach dá dtagraítear in Airteagal 47 de Rialachán (AE) Uimh. xxx lena mbunaítear Fís Eorpach.
- (8) Tabharfaidh na hathbhreithnithe tréimhsiúla agus na meastóireachtaí eolas d'fhoirceannadh nó d'athnuachan féideartha an Chomhghnóthais, ag teacht le hIarscríbhinn III de Rialachán (AE) Uimh. xxx lena mbunaítear Fís Eorpach. Laistigh de sé mhí ó fhoirceannadh an Chomhghnóthais, ach tráth nach déanaí ná dhá bhliain tar éis an nós imeachta foirceanta dá dtagraítear in Airteagal 24 de na Reachtanna a thruicearú, cuirfidh an Coimisiún meastóireacht deiridh i gcrích maidir leis an gComhghnóthas. Cuirfear torthaí na meastóireachta deiridh sin faoi bhráid Pharlaimint na hEorpa agus na Comhairle.
- (9) Déanfaidh an Coimisiún torthaí na meastóireachtaí ar an gComhghnóthas, ina n-áireofar conclúidí na meastóireachta agus breathnóireachtaí an Choimisiúin, a chur in iúl do Pharlaimint na hEorpa, don Chomhairle, do Choiste Eacnamaíoch agus Sóisialta na hEorpa agus do Choiste na Réigiún mar chuid de na meastóireachtaí in Fís Eorpach dá dtagraítear in Airteagal 47 de Rialachán (AE) Uimh. xxx lena mbunaítear Fís Eorpach.

Airteagal 23

Dlínse Chúirt Bhreithiúnais an Aontais Eorpaigh agus an dlí is infheidhme

- (1) Beidh dlínse ag Cúirt Bhreithiúnais an Aontais Eorpaigh:
 - (a) de bhun aon chlásal eadrána atá i gcomhaontuithe nó i gconarthaí arna gcur i gcrích ag an gComhghnóthas, nó ina chuid cinntí;
 - (b) i ndíospóidí a bhaineann le cúiteamh de bharr damáiste a rinne foireann an Chomhghnóthais i gcomhlíonadh a gcuid dualgas;
 - (c) in aon díospóid idir an Comhghnóthas agus a fhoireann laistigh de theorainneacha agus faoi na coinníollacha a leagtar síos sna Rialacháin Foirne nó sna Coinníollacha Fostaíochta.
- (2) Maidir le haon ábhar nach bhfuil cumhdaithe leis an Rialachán seo nó le haon ghníomhartha dlíthiúla eile an Aontais, beidh feidhm ag dlí an Bhallstáit ina bhfuil suíochán an Chomhghnóthais lonnaithe.

Airteagal 24

Gearáin leis an Ombudsman

D'fhéadfadh cinntí a ghlacann an Comhghnóthas maidir leis an Rialachán seo a chur chun feidhme a bheith ina ábhar gearáin leis an Ombudsman i gcomhréir le hAirteagal 228 den Chonradh ar Fheidhmiú an Aontais Eorpaigh.

Airteagal 25

Iniúcháireacht ex-post

- (1) Déanfar iniúcháireacht ex-post ar ghníomhaíochtaí arna gcistiú ag an mbuiséad do Fís Eorpach i gcomhréir le hAirteagal 48 de Rialachán (AE) Uimh. xxx lena mbunaítear Fís Eorpach mar chuid de na gníomhaíochtaí indíreacha in Fís Eorpach, go háirithe ag teacht leis an straitéis iniúcháireachta dá dtagraítear in Airteagal 48(2) den Rialachán sin.
- (2) Déanfaidh an Comhghnóthas na hiniúcháireachta ex-post maidir le caiteachas ar ghníomhaíochtaí arna gcistiú ag an mbuiséad don Eoraip Dhigiteach i gcomhréir le hAirteagal xxx de Rialachán (AE) Uimh. xxx lena mbunaítear an Clár don Eoraip Dhigiteach.
- (3) Déanfaidh an Comhghnóthas na hiniúcháireachta ex-post maidir le caiteachas ar ghníomhaíochtaí arna gcistiú ag an mbuiséad don tSaoráid um Chónascadh na hEorpa i gcomhréir le hAirteagal xxx de Rialachán (AE) Uimh. xxx lena mbunaítear an tSaoráid um Chónascadh na hEorpa mar chuid de ghníomhaíochtaí na Saoráide um Chónascadh na hEorpa.

Airteagal 26

Leasanna airgeadais na mball a chosaint

- (1) Deonóidh an Comhghnóthas rochtain d'fhoireann an Choimisiúin agus do dhaoine eile atá údaraithe ag an gComhghnóthas nó ag an gCoimisiún faoi seach, chomh maith leis an gCúirt Iniúcháirí, ar a chuid láithreán agus áitreabh go léir agus ar an bhfaisnéis go léir, lena n-áirítear faisnéis i bhformáid leictreonach, a theastóidh uathu chun a gcuid iniúcháireachta a dhéanamh.

- (2) Féadfaidh an Oifig Eorpach Frith-Chalaoise (OLAF) agus Oifig an Ionchúisitheora Phoiblí Eorpaigh (EPPO) imscrúduithe a dhéanamh, lena n-áirítear seiceálacha agus cigireachtaí ar an láthair, i gcomhréir leis na forálacha agus na nósanna imeachta a leagtar síos i Rialachán (Euratom, CE) Uimh. 2185/96 ón gComhairle⁹ agus Rialachán (CE, Euratom) Uimh. 883/2013 ó Pharlaimint na hEorpa agus ón gComhairle¹⁰ agus d'fhonn a shuí ar tharla calaois, éilliú nó aon ghníomhaíocht neamhdhleathach eile a dhéanann difear do leasanna airgeadais an Aontais i ndáil le comhaontú, nó le cinneadh nó conradh a mhaoinítear faoin Rialachán seo.
- (3) Gan dochar do mhír 1 ná do mhír 2, beidh forálacha sna comhaontuithe, sna cinntí agus sna conarthaí a eascróidh ón Rialachán seo a chur chun feidhme, lena dtabharfar an chumhacht go sainráite don Choimisiún, don Chomhghnóthas faoi seach, don Chúirt Iniúchóirí, do EPPO agus do OLAF na hiniúchtaí, seiceálacha ar an láthair agus cigireachtaí sin a dhéanamh i gcomhréir lena gcuid inniúlachtaí faoi seach.
- (4) Áiritheoidh an Comhghnóthas go dtabharfar cosaint leordhóthanach do leasanna airgeadais a chuid comhaltaí trí rialuithe inmheánacha agus seachtracha iomchuí a chur i gcrích nó trína gcoimisiúnú.
- (5) Aontóidh an Comhghnóthas do Chomhaontú Idirinstitiúideach an 25 Bealtaine 1999 idir Parlaimint na hEorpa, an Chomhairle agus an Coimisiún maidir le himscrúduithe inmheánacha arna seoladh ag an Oifig Eorpach Frith-Chalaoise (OLAF)¹¹. Glacfaidh an Comhghnóthas na bearta riachtanacha is gá chun imscrúduithe inmheánacha a chuirfidh OLAF i gcrích a éascú.

Airteagal 27

Rúndacht

Áiritheoidh an Comhghnóthas go dtabharfar cosaint d'fhaisnéis íogair a bhféadfadh a nochtadh sin damáiste a dhéanamh do leasanna a cuid ball nó do na rannpháirtithe i ngníomhaíocht an Chomhghnóthais.

Airteagal 28

Trédhearcacht

Beidh feidhm ag Rialachán (CE) Uimh. 1049/2001 ó Pharlaimint na hEorpa agus ón gComhairle¹² maidir le doiciméid atá i seilbh an Chomhghnóthais.

Airteagal 29

Próiseáil sonraí pearsanta

⁹ Rialachán (Euratom, CE) Uimh. 2185/96 ón gComhairle an 11 Samhain 1996 maidir le rialuithe ar an láthair agus cigireachtaí arna ndéanamh ag an gCoimisiún d'fhonn cosaint a thabhairt do leasanna airgeadais na gComhphobal Eorpach i gcoinne calaoise agus neamhrialtachtaí eile (IO L 292, 15.11.1996, lch. 2).

¹⁰ Rialachán (AE, Euratom) Uimh. 883/2013 ó Pharlaimint na hEorpa agus ón gComhairle an 11 Meán Fómhair 2013 maidir le himscrúduithe arna ndéanamh ag an Oifig Eorpach Frith-Chalaoise (OLAF) agus lena n-aisghairtear Rialachán (CE) Uimh. 1073/1999 ó Pharlaimint na hEorpa agus ón gComhairle agus Rialachán (Euratom) Uimh. 1074/1999 ón gComhairle (IO L 248, 18.9.2013, lch. 1).

¹¹ IO L 136, 31.5.1999, lch. 15.

¹² Rialachán (CE) Uimh. 1049/2001 ó Pharlaimint na hEorpa agus ón gComhairle an 30 Bealtaine 2001 maidir le rochtain phoiblí ar dhoiciméid ó Pharlaimint na hEorpa, ón gComhairle agus ón gCoimisiún (IO L 145, 31.5.2001, lch. 43).

I gcás ina n-éilítear le cur chun feidhme an Rialacháin seo go ndéanfaí sonraí pearsanta a phróiseáil, déanfar iad a phróiseáil i gcomhréir le Rialachán (AE) 2018/1725 ó Pharlaimint na hEorpa agus ón gComhairle¹³.

Airteagal 30

Rochtain ar thorthaí agus faisnéis maidir le tograí

- (1) Tabharfaidh an Comhghnóthas rochtain d'institiúidí an Aontais agus do chomhlachtaí, oifigí agus do ghníomhaireachtaí an Aontais ar an bhfaisnéis go léir a bhaineann leis na gníomhaíochtaí indíreacha a bhíonn á gcistiú aige. Áireofar san fhaisnéis sin torthaí na dtairbhíthe a bheidh rannpháirteach i ngníomhaíochtaí indíreacha an Chomhghnóthais nó aon fhaisnéis eile a mheastar is gá chun beartais nó cláir an Aontais a fhorbairt, a chur chun feidhme, a fhaire agus a mheas. Tá cearta rochtana den sórt sin teoranta d'úsáid neamhthráchtála agus neamhiomaíoch agus comhlíonfaidh siad na rialacha rúndachta is infheidhme.
- (2) Chun críocha beartais nó cláir an Aontais a fhorbairt, a chur chun feidhme, a fhaire agus a mheas, soláthróidh an Comhghnóthas faisnéis don Choimisiún Eorpach a áirítear i dtograí a chuirtear isteach.

Airteagal 31

Rialacha maidir le rannpháirtíocht agus leathadh infheidhme maidir le gníomhaíochtaí indíreacha arna gcistiú faoi Fís Eorpach

Beidh feidhm ag Rialachán (AE) Uimh. xxx lena mbunaítear Fís Eorpach maidir leis na gníomhaíochtaí indíreacha arna gcistiú ag an gComhghnóthas faoi Fís Eorpach. I gcomhréir leis an Rialachán sin, measfar gur comhlacht cistiúcháin é an Comhghnóthas agus tabharfaidh sé tacaíocht airgeadais do ghníomhaíochtaí indíreacha mar a leagtar amach in Airteagal 1 de na Reachtanna.

Beidh feidhm freisin ag Rialachán (AE) Uimh. xxx lena mbunaítear Fís Eorpach maidir leis na gníomhaíochtaí indíreacha a bheidh dá gcistiú ag ranníocaíochtaí an Stáit Rannpháirtigh dá dtagraítear i bpointe (f) d'Airteagal 15(3) de na Reachtanna.

Airteagal 32

Rialacha is infheidhme maidir leis na gníomhaíochtaí arna gcistiú faoin tSaoráid um Chónascadh na hEorpa

Beidh feidhm ag Rialachán (AE) Uimh. xxx lena mbunaítear an tSaoráid um Chónascadh na hEorpa maidir leis na gníomhaíochtaí arna gcistiú ag an gComhghnóthas faoin tSaoráid um Chónascadh na hEorpa.

Airteagal 33

Rialacha is infheidhme maidir leis na gníomhaíochtaí arna gcistiú faoin gClár don Eoraip Dhigiteach

¹³ Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch. 39).

Beidh feidhm ag Rialachán (AE) Uimh. xxx lena mbunaítear an Clár don Eoraip Dhigiteach maidir leis na gníomhaíochtaí arna gcistiú ag an gComhghnóthas faoin gClár don Eoraip Dhigiteach.

Airteagal 34

Tacaíocht ón mBallstát aíochta

Féadfar comhaontú riaracháin a chur i gcrích idir an Comhghnóthas agus an Ballstát ina bhfuil a shuíochán lonnaithe maidir le pribhléidí agus díolúintí agus tacaíocht eile a chuirfidh an Stát sin ar fáil don Chomhghnóthas.

Airteagal 35

Aisghairm

- (1) Gan dochar do na gníomhaíochtaí arna dtionscnamh faoi Rialachán (AE) Uimh. 2018/1488 lena n-áirítear pleananna bliantúla cur chun feidhme agus oibleagáidí airgeadais a bhaineann leis na gníomhaíochtaí sin, déantar Rialachán (AE) Uimh. 2018/1488 a aisghairm leis seo.

Maidir leis na gníomhaíochtaí arna dtionscnamh faoi Airteagail 10, 11, 13 agus 14 de Rialachán (AE) Uimh. 2018/1488, chomh maith le hAirteagal 6 agus Airteagal 7 de na Reachtanna atá i gceangal leis an Rialachán sin, leanfar dá gcur i bhfeidhm a mhéid is gá go dtí go mbeidh siad tugtha chun críche.

Gníomhaíochtaí a eascraíonn ó ghlaio ar thograí agus ó ghlaio ar thairiscintí dá bhforáiltear i bpleananna bliantúla cur chun feidhme arna nglacadh faoi Rialachán (CE) Uimh. 2018/1488, is mar ghníomhaíochtaí a tionscnaíodh faoin Rialachán sin a dhéanfar iad a mheas.

- (2) Tuigfear gurb ionann gach tagairt a dhéanfar do Rialachán (AE) Uimh. 2018/1488 mar thagairtí don Rialachán seo.

Airteagal 36

Forálacha idirthréimhseacha

- (1) Ní dhéanfaidh an Rialachán seo difear do chearta agus d'oibleagáidí na foirne atá fostaíthe faoi Rialachán (CE) Uimh. 2018/1488.
- (2) Chuige sin leanfar de chonarthaí fostaíochta na foirne faoin Rialachán seo i gcomhréir leis na Rialacháin Foirne agus leis na Coinníollacha Fostaíochta.
- (3) Ar feadh na tréimhse atá fanta den téarma oifige, sannfar an Stiúrthóir Feidhmiúcháin arna cheapadh faoi Rialachán (AE) Uimh. 2018/1488 d'fheidhmeanna an Stiúrthóra Feidhmiúcháin dá bhforáiltear sa Rialachán seo le héifeacht ó theacht i bhfeidhm an Rialacháin seo. Ní thiocfaidh aon athrú ar choinníollacha eile an chonartha.
- (4) Mura gcomhaontaítear a mhalairt idir na comhaltaí, déanfar na cearta agus na hoibleagáidí go léir lena n-áirítear sócmhainní, fiachais nó dliteanais na gcomhaltaí arna sealbhú de bhun Rialachán (AE) Uimh. 2018/1488 a aistriú chuig na comhaltaí de bhun an Rialacháin seo.
- (5) Sa chéad chruinniú a bhí aige tar éis theacht i bhfeidhm don Rialachán seo, glacfaidh Bord Rialála an Chomhghnóthais liosta cinntí a glacadh faoi Rialachán (AE)

Uimh. 2018/1488 a mbeidh feidhm leo fós faoin Rialachán seo. Déanfar aon leithreasuithe nár úsáideadh faoi Rialachán 2018/1488 a aistriú chuig an gComhghnóthas Ríomhaireachta Ardfheidhmíochta Eorpach arna bhunú faoin Rialachán seo.

- (6) Déanfar na cearta agus na hoibleagáidí go léir lena n-áirítear sócmhainní, fiachais nó dliteanais an Chomhghnóthais agus aon leithreasuithe nár úsáideadh faoi Rialachán (AE) Uimh. 2018/1488 a aistriú chuig an gComhghnóthas Ríomhaireachta Ardfheidhmíochta Eorpach faoin Rialachán seo.

Airteagal 37

Teacht i bhfeidhm

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann na Comhairle
An tUachtarán